

平定州志

藝文下

第四十冊

平定州 附 樂平鄉藝文志卷十四

乞減樂平縣課額劄子

宋 歐陽修

臣昨至河東據平定軍知樂平縣孫直方狀爲本縣酒稅課利錢舊額四千一百餘貫本縣不當驛路舊有兵士四指揮軍營在縣自慶曆三年三月內移起軍營往并州在縣只有居民百餘戶人烟旣少客旅不來酒稅課利無由趨辦本軍亦曾申奏乞行減額省司下轉運司保明尋蒙轉運司令將起移軍營後一年比較重立租額只及二千八

平定州志

藝文 劄子

一

沾

百餘貫亦曾差遼州知州孟濟定奪及轉運司保明申省省司指揮勒本縣收趨課利不得減額臣勘會平定軍樂平縣最處孤僻若無軍營人戶絕少實難趨辦課利見今專副等逐月逐季逐年各有比較決責未嘗虛日及虛令監官殿降考第臣今欲乞特降勅旨下轉運司令起卻樂平縣軍營後來一年內所收課利立爲租額與免舊額虛數所貴專副不至重疊被刑監官虛負殿罰取進止

舉孫直方奏狀

歐陽修

右臣伏見平定軍知樂平縣事著作佐郎孫直方
進士及第性明敏有吏材臣昨至河東備見直方
治縣事善狀臣今保舉堪充大藩通判兼臣勘會
代州通判李舜元到任已及二年三個月有餘見
今北面事宜代州最爲要地尤藉得人伏乞就差
孫直方充代州通判如後犯眞入已贓及職事敗
闕並甘同罪謹具狀奏聞

奎星樓碑銘

明 喬 宇

環樂平皆山也學在縣之東隅創自洪武中規制

平定州志

藝文 碑銘

二

沾

嚴密高亢爽塏蒙山突秀於左沾嶺迭青於右漳
水縈帶臯落周廻壯圖勝槩甲於他邑正德四年
縣侯韓君清嘗卽櫺星門東之隙地構奎星樓三
楹凡若干丈賁以丹堊飾以欄楯簷牙高啄氣象
豁然侯與邑博訓導張君智李君清每朔望禮畢
則登斯樓與諸生討論經義憑虛四望山川在目
覽今思古慨然有感於懷因相與議曰茲樓之成
不經費於公帑不濫役於民力期月而工告成信
茲學之偉觀也不有紀述何以示遠而詔來遂走

使京師請予言以志歲月余爲邑人聞茲盛事且
嘉侯之丕振儒風增闡道化詞旨蕪陋不可不彰
厥美也爰記顛末復系以銘曰五星載運倬彼於
天經緯遞象麗采周旋奎躔燦陳陬訾降婁昭回
璿璧焜燿文猷馬圖肇啟神明幽贊天祿摛詞晶
熒在漢東井攸聚治教休明俊又彪炳溶溶頌聲
天相國家鬻宮碁布登崇六經層樓罨護藝苑蜚
英繼繼繩繩台曜虹采斯文之徵

長子縣令崔公祠堂記

宋 管 蒙

平定州志

藝文記

三

沾

古之縣令皆選賢能欲有所用必先試以臨人故
銅章墨綬出宰百里悉能盡瘁職事而由漢以來
號爲循吏者不可勝數長子縣舊有唐縣令崔君
祠堂君諱元靖嘗宰是邑以異政稱而唐史不載
縣之東北數里有碑蓋紀其事又歲久磨滅特故
老相傳云山有虎害人君祈諸神不以強弓毒矢
而以一介之士追虎至而殺之旣去邑人遂爲立
祠刻石嗚呼君之德過人遠矣雖沒數百歲而遺
風餘烈可想而畏也昔紫芝爲魯山令有盜繫獄

會虎爲暴盜請格虎自贖吏謂詭計紫芝許之明日盜尸虎還舉縣嗟嘆唐史且美其事而書之君有異政如此獨不得留名青史間何不幸歟管城宋君卓犖有古人風崇甯五年來此布政下車之始聞其事而駭之曰君能生爲人除害死必能福人明年命易其祠而新之將使邑人歲時水旱疾疫而祈禱焉孰謂君無靈

義勇武安王廟記

元 宋 超

義勇武安王祠徧天下獨吾鄉樂平最古且著按

平定州志

藝文記

四

沾

傳王家世河東從漢昭烈避患居涿之樓桑棲遲日久由樓桑抵河東必道樂平意當年遊衍之迹及樂平爲多雖後千載宜未忘樂平也故吾樂平祠靈享異諸方民有事必禱禱輒應而舊廟在城南金正大四年郡丞范君燧始改築南門內國朝中統年間遷邑治之北雖每遷輒增舊制然因舊相承未底崇極且逼臨厓市湫隘喧囂非所以妥神靈愜民意也延祐初元春鄉試溧陽同知翟君公輔遵厥考鎮撫公遺命審曲面勢卽舊址益北

爲步三十營構之南市崇教院二畝有奇創建新廟虛其前道以屬通衢於是幽遐衍敞廓然煥然棟梁屹屹垣墉秩秩材堅制良黝堊丹漆舉盡其度落成而祭神旣顧享人亦慰暢歲乃大穰物無札瘥然役大費煩公輔旣獨力無怠色而其弟莊鳳誠誼泊邑之顯家更相成之工旣畢公輔走使京師徵予記惟古今名臣烈士生而烜赫於時沒而寂寂無聞者何限惟王巋然廟食列於祀典四海之內尸而祝之愈久而不替果何修而致此蓋

東京失御羣雄朶頤漢鼎曹袁張呂孫氏之徒虎視鴟張籠檻豪傑王抱蓋世之略絕倫之勇固羣雄所願揖下風者也而王自重如山一不屑顧獨追隨罷困無聊之照烈溟渤可竭誓言不渝也金石可磨初心不轉也誠以昭烈帝室之胄寬仁下賢若輔之以興復漢室則義詞順而斯世被其澤矣彼崛起犯分乘時陸梁者王視之直鬼蜮蠹賊之倫耳顧肯爲屈乎於戲烏林之走曹瞞襄樊之擒于禁風戈雨旆囊括宇宙之勢而漢事將成矣

天不再熾火德功用不就此豈人力所能爲哉君子論王忠義耿耿能擇所從光於蕭曹班於吳賈而雄武遠過之然蕭曹吳賈猶各得忠於當時而王世世歆祀千載之下凜然有生氣民思其義耳予獨有感者王於樂平爲舊遊其顧盼饗福斯民宜矣而吾鄉樂平之士虔恭奉王竭力新廟如念私事雖費不辭雖勞不懈其樂慕忠義蓋出於天性夫擇主而忠於漢者王之盛節慕義而厚於神者樂平之雅俗皆關名彞世教故不得不書

平定州志

藝文記

六

沾

松峰書院記

元

呂思誠

中書左丞

縣治南羅莊孔氏作書院於三都別墅蓋羅莊與三都一社也又近在松子嶺下故名曰松峰夫孔氏家世曲阜其嗣世子孫守林廟而私淑有宗而不紊固也自干戈亂離擇里而居樂平於是有孔氏云由周而來至於今去聖人之世若此其甚遠也而晉魯相望近在咫尺去聖人之居若此其未遙也愾然如聞其聲穆然如見其容水木本源之思甯以異地異時而有間乎羅莊孔克威求記思

誠爲松峰書院額又書夫子燕居殿一楹聞詩聞
禮者二齋思誠起而言曰孔子之道大矣孔子之
澤長矣天覆地載日月照臨雨露之所潤無非教
也斂袂拱手以至取瑟叩脛無非教中事也闕黨
童子可以將命互鄉童子亦得登堂入室斂容屏
息於其側無非教中人也億萬斯年之久上自王
宮國都下逮閭巷莫不有學以識羹牆樂平素稱
仁里家詩書而戶禮樂有彬彬君子之風豈皆宮
牆外望者與故克威之爲此非徒爲子孫設欲以

來遠方之朋也而里人氏有近三都撥地三頃以
與書院而爲書院子弟之供其事又不可湮沒而
無聞因並錄之以與克威孔氏並傳不朽後有作
者見其廟貌輝煌輪焉奐焉孔子在焉松聲謾謾
響振山邱孔子之木鐸在焉宰我謂其賢於堯舜
甚遠厥有以哉昔者思誠立書院於冠山奎章閣
學士院奉中書禮部移文宣慰司下冀甯路指揮
平定州儲書萬餘卷謀欲置田一二頃至今無一
畝欲銘石作記力又不贍噫有愧於克威也夫再

拜而文旣以嘉孔氏之賢且以譏思誠之不能是
爲記

甕山祠靈應記

明 趙 敏

甕山祠在縣東七十里北近龍安南連臯落東逼
楊趙河祠建山側中峰巒抱合草樹陰森峻則隔
離天日深則氣脈河山興雲吐霧四時不窮屹然
天地間勝蹟也中有龍潭若甕其深不測巨石上
覆陡岸下絕甕水澄碧毫毛莫遁臨之者屏氣失
色息妄絕私其視雷澤濟淵想不甚殊每歲旱禱

雨於此罕有不應鄉人神而祀之久矣余前未知
其然也乃嘉靖歲庚申春不雨夏又不雨人如在
湯火中嗷嗷然無所控愬時則族長暨鄉人等約
予兄弟仝禱於祠至則首禮神像循廟而下石磴
側仄步不容縱旣縮縮緣石以上至潭所僅可措
足金鼓響處雷憲轟然風雨灑然覺清氣徹骨潭
影空心而凜乎不可留矣已而投祝於水若或納
之退俟休命再宿簷畔次午忽雲雷起東北天外
遠山隔障不知其幾十重而風雨飄忽頃達臯落

若或驅之是日雨越五日又大雨時七月初三日
也是歲禾半熟人不至死嗚呼亢旱之餘何以得
此以是知神龍澤物之功爲不誣也又二載壬戌
雨時行穀時成吾鄉人有獨康於諸方者余兄弟
思其所自謂不可不刻石以昭靈異也博謀鄉人
翕然從之於是乎記

宋雙松壽藏記

明張魯
本縣知縣

宋公號雙松諱天良字純一壽享遐齡卜佳城於
西城之原鑿石甃槨詣予而言素有宦績願紀於

平定州志

藝文記

九 沾

石以詔嗣世按公高祖忠曾祖貴曾叔祖俊登永
樂辛卯鄉試第一大父璞字仲玉父彪字文炳皆
以行義見重於鄉人公幼而狷介拾遺物必訪送
之稍長博學能文補邑庠弟子員壯歲以運蹇曲
就爲宣府掾繼丁內外艱居喪守禮撫諸弟至於
成立後丁大母艱雨集四十日及葬開霽人以爲
孝友所感嘉靖癸未起授河南嵩縣縣丞卽自誓
曰設官以爲民非以剝民厲民自養吾不爲也先
是嵩有吏書通賄豪族陵縱疑獄難決逋寇難平

兼以伏牛山在四百里外其民恃遠不服前官悉
莫能制公下車竄伴書李倉於戊寅土豪陸紀於
法析劉雄伊田之爭釋張堂無辜之獄捕剽剗之
寇厲遊食之禁自是吏無舞文民無豪猾獄無遁
情野無劫掠雖伏牛山之民亦相率而服從之時
境內大旱公爲巡行阡陌所至卽雨人謂之隨車
雨嵩之士大夫胥以吏畏民懷政平訟理者擬之
當道重其賢能使署鞏縣事有民欲徙河入洛者
僉憲葉公使公相其便宜公陳勞民傷財無功有

害四事遂止時天兵南下過鞏縣佐貳不能備軍
需公爲之下令庶事立辦葉公益嘉之繼委署孟
津縣事公緝知舟子多阻厄商賈以要利者罪其
尤以革河津之弊抱關吏以稅羊饋公却其物以
去關市之征其廉直惠義在嵩在鞏在孟津者大
略如此由是聲聞於上伊藩賜以宮錦巡撫旌以
剛明果斷佐政賢能巡按旌以事克勤於幹濟志
欲尚乎高明藩臬交章超擢可待而公已上掛冠
之狀矣雖當道挽留士民攀轅公志有不欲變者

戊子歸家行李蕭然襟懷坦若始出俸餘以廣田宅謂禮云君子將營宮室必先祠堂乃營祠以祀其先謂古之教者家有塾遂立塾以教其子謂君子貴未然之防卽依居之東阜築寨以守其家謂人生貴適志耳卽爲泛觴之池邀縉紳材智之士與共樂之其綜理周密類非庸材所能辦者嘗植雙松於堦以寓歲寒後彫之意時張別駕王大尹至而識之因勸其爲號焉公性好施而且剛直與鄉人處賑貧周乏而不責其報至於有過必正言

之有犯必明辨之不徇人以非禮之恭不與人爲苟合之事自少至老無一私曲之行貪鄙之事故嘗自爲之說曰存心正直豈敢欺人天理在處事無差但有私意鬼神知又曰壽近八旬堪老健官居六載可貧歸其以善自信如此予慕公之行實因仰思之易彖曰剛中而應公之制行以之傳曰恒以一德公之始終廉靜以之書曰惟克果斷公之當官以之史曰知止不殆公之謝政以之而至於壽享八袞過此以往未之或知卽孔子所謂仁

者壽也宜爾子孫繩繩相繼卽蘇子所謂仁者必有後也乃若預卜壽藏於南平又洪範考終之一德云爾是爲記

呂邑侯德政生祠記

宋時杰

嘗讀循良傳嘆曰召父杜母千載之下令人有遐思故求循良於盛世則易至國步多艱之日則難吾邑自寇殘之後師旅繁興飢饉頻仍廊廟之追呼屢增閭閻之蕭條日甚百事廢閣雖有善者無能爲矣崇正戊寅秋上命我公宰是邑公司馬世

平定州志

藝文記

十一

沾

家人方謂蕞爾荆棘豈堪棲止公正欲以盤錯試利器也甫下車首重鄉約化民爲善禁革火耗勸完國課不罰贖緩勸息忿爭學宮傾圮倡士紳以修飾城垣朽壞量殷實以葺補立站頭擇總管通國脈也募壯丁選團練壯國威也課文作士積儲備兵且不徇請託不遣衙役晝夜嚴於城守糴買現發市價以愷悌心體出之精明政事間有雷霆不過禁伏兇豪以保安良善也方期月撫按擬調奈國家多事東南流寇未靖撫綏實非易易聖天

子憂兵食不足當事者議增額外詔下晉省加賦
什一公以地僻民貧力爭於上僅分其半邑人德
之咸議立祠以報余謂能興大利則祠之除大害
則祠之如公德政允合祠典卽構基於西門之外
欲朝夕親炙其道範令世世子孫步趨也於是擇
勤慎趙思詰毛舞鳳等以督其事公恐以壯麗勞
民極力止之余不敢方上之命亦不敢拂民之情
謹治垣墉以爲焚拜之地崇樸儉也公貴介之弟
恬靜如處子肉食之家淡素似寒生惟居家大有

守故居官大有爲其三晉循良之最中州士林傑
出者中州風氣之正故士多奇行如前任淇澳劉
公一塵不染可稱遺愛鄴郡尚公百折不回可稱
遺直兼之者惟我公皆當今之召杜也因建祠而
思併及之

重修鳳凰山神廟記

王祚永

環沾皆山也而山之中偉然聳秀屏蔽於縣城之
北者則鳳凰山也里人相傳昔年曾有鳳凰棲其
上故以是名焉去縣北八里許風水家以爲是縣

之主崗因建眾神廟於其巔悉司風雲雷雨庇護生民予泣茲土每歲循例往祭焉但見其廟宇傾頹者有之神像毀壞者有之因念人祈福於神神棲靈於廟廼廢墜若此則神之靈其何所棲而人又何所祈乎矢念捐俸修理以爲士民倡而邑之好善者咸欣欣樂助工且又得文學趙生怙李生之品董率其事不憚勤勞而諸廟煥然一新更可異者山迤左半里許有水神廟其傍舊有泉在泉枯已三十餘年廟亦塌盡當茲建工之始而泉水

忽生久之漸充滿洋溢予同眾往觀無不喜動顏色曰異哉斯泉也豈非神所感應而然哉爰復建厥廟一時均成工及各廟成諸人士強予記之以爲相傳盛事予思古有毀祠焚廟者以其淫且妖耳若夫神之正者澤及民生福庇四境則其廟何可不修而神安可以不敬是舉也以爲有合乎神意當乎人心理或然也又召香火僧數人住持其間苦無衣食而慨然好善捐施地畝爲香火遠久計者則王生是堯也諸工事旣備矣但願自茲以

往五風十雨時和年豐挽彫疲而成熙皞士民咸樂是則神之靈也夫是則神之靈也夫

新建琴樓記

俞允捷

余自庚申歲泣任茲土目擊官舍僅卑隘數椽足蔽風雨苦無登覽之所且原設宅門於二堂之後逼近私宅言語之聲內外相聞遂更其舊制易宅門於大堂後以備傳宣而內院始恢擴焉復建兩楹於二堂之東以爲晉接之地然而宅室淺隘樓止跼促欲宏其制而不得廣其椽而不能幸宅後

有隙地可以築舍訪之故老舊有樓云歷今甲子已週竟成藁莽無復有人肯堂肯構余卽立志興築無如甫臨山邑百廢未舉一政未行夙夜爲生民計何暇爲安身策乎閱數載至乙丑歲時和年豐民物安樂喜弦歌之有聞覺揮絃而可理調琴洗鶴綽有餘閒於是誅茅掃穢鳩工庀材構樓五間兀然聳峙高出諸廈頗稱輪奐一新因題其額曰琴樓蓋居上以臨下登高而望遠深慕乎宓子之政清獻之風焉然斯樓也固而不墜樸而少文

高不過齊雲落星華不如井幹麗譙余殆止爲永
久計而未嘗以文飾爲也所望後之君子登斯樓
而克思夫作樓命名之義勉爲鳴琴雅化無徒視
爲眺覽之所而馳情於高山流水之音是又斯民
之厚幸也庶斯樓其亦可以不朽夫

移建文昌祠記

馬光

天文志文昌六星在北斗魁前蓋主集計天道桂
籍其所司之一也從來人文學士莫不尸而祀之
社而稷之故歷朝代興隸於

先師春秋丁祭其建詞設像必卜地於黌宮之前後左
右所以妥神亦藉爲風氣之助焉耳樂邑

神祠棲縣庠之東偏由來舊矣甲戌秋余蒞茲土瞻
拜階前見其左凌城堞右偪東廡不惟地甚湫隘
且有漸近傾圯之勢因歲之不時軍需屢迫補葺
未遑也歲至壬午年頗順成士民亦相休息庠之
紳士謀改建別所而質之於余曰舊制規模狹小
地亦卑暗邇來士少顯達或舉而歸咎於此盍擇
地而移置之余曰不然人傑地靈咎不專在地也

嘗考邑乘昔之鱗鱗炳炳光史冊而昭後世者他不具論賜鼎甲者四人領鄉薦者五人至於德業文章如崔喬李趙諸公皆天下士也神不棲此也耶僉曰不然人事有興廢地氣有轉移前之所取後或棄之甲之所增乙或減之旱潦無常期社稷有變置豈皆舊貫是仍乎庠西隙地古射圃也廣濶而軒敞建之便余曰然乎其人神相依幽明一理僉謀既協神其妥之矣國之大事在祀與戎况爲風氣攸關乎是余之責也獨是業已狹小前制

則規模不得不宏規模既宏則工費不得不廣余雖以一身肩之而眾擎之舉尤樂與同人共成之也僉曰是則然也於是踴躍樂輸鼓舞從事首建正殿三楹而前之軒後之樓相繼而建焉周則有垣也門則重設也歌舞亭臺亦因之而無不備也石獨帝像莊嚴巍煥改觀其畫棟雕欄蓋亦璀璨奪目矣余謂人文升降盛衰之故雖曰天運而地勢與人事參半焉

帝君爲斯文總持其陰隲一訓誥誠諄諄無非勸人

存好心行好事忠孝敬信以敦倫仁恕公平以濟物亦士先德性而後文藝之意也凡我多士誠遵聖訓而身體力行之將見人傑地靈賢才蔚起於以繼美前哲而後先輝映余將拭目俟之矣是爲記

新建鳴鳳樓記

趙尚友

本縣知縣

樓名鳴鳳因朝陽也朝陽南門舊名石刻甕城之南額門則紆而東也余於癸卯冬自鹿祁調任茲邑周覽而異之思欲出午向離以賁文明未暇也至丙午秋杪始闢其南塞其東復朝陽之形制邑

人樂之已週歲矣余曰門無樓觀弗壯也且有朝陽必當有鳴鳳盍因而築鳴鳳樓於朝陽門之上謀諸紳士咸躍然惟恐後焉且畚鍤運土或削或築或經或營始於仲秋壬寅終於初冬癸卯不浹七旬而樓已落成遂偕李賁軒趙明西及同學諸子而登焉製匠巧結構精棖楹其有覺也簷宇其翬飛也由中四望蒼翠之色飽我目淡蕩之致怡我神廓然敞者襟與開超然脫者志與適夫塢烟遠吐屋鱗邇密綽楔軒露甲第雲連舉繚繞迴合

呈技獻巧聽用於譙廡之下爰復進諸生而謂之
曰樂城環水抱山形勢挺秀代毓名賢文獻炳於
前白巘蔚於後文章事業今古羽儀他如掇巍科
膺顯爵者枚不勝舉固皆昔代之鳴鳳也地靈鍾
秀不其然乎今斯樓飛凌霄漢俯翼郊原北枕鳳
凰南臨石馬攬奇於臯落挹翠於松峰形勢之萃
何如昔時耶諸生其備九苞之采成六德之文誰
其聲翮其羽作朝陽之鳴鳳顯

聖世之休徵不負今日創建命名之意是余之願也余
之所深期也既以語於人退而爲之記

平定州志

藝文

十九

沾

重修文昌祠記

趙南年

文昌祠建於文廟之左奎星樓之下堪輿家謂其
規制卑狹氣不開暢邑侯魯陽馬公移建於學宮
之右係縣官地草廡舊址取其地濶氣長祠後建
北樓三楹東舍三楹祠前創四明亭一座南創樂
樓三楹以樓中間作祠大門每遇獻戲將門閉塞
觀者嘆其未善多士未及改作幸逢邑侯蒲公西
蜀名宿熙世祥麟來泣茲土以成民事神爲務約

已削浮而獨於斯祠加意修補所費募緣之外盡捐已俸命生與生員李名最者董於其事焉於後院修補西舍三楹亭前新建鐘鼓二樓及大門並磚坊一座改移樂樓若干丈左右開興龍起鳳二門非復前之有碍出入也規模井井紳士稱慶公又立義學於其中召士民之願讀書者延師課業獨備館資委生等爲記以垂永久生惟文昌爲斯文之主斯祠爲育材之地昔文翁治行爲天下第一考其實以興教化爲務而子產有輿人之誦亦

以能誨子弟也今公作養人材大有造於斯邑與文翁相後先而邑之士民歌功詠德於不衰又孰謂輿人之誦在鄭大夫後卽絕響耶斯舉也邑侯拔貢馬公諱光肇造經始於先舉人蒲公諱蒼璧增修完成於後非僅造福一時且以垂休百世誰其忘哉因并記其事云

槐蔭書齋記

余志耽岑寂癖嗜印樊十年夢繞西湖而一官匏繫未遂卜居歲王申春偶於官署小築書齋數楹

居內外宅之間距廳事稍遠雕琢不施圖書四壁
頗覺瀟灑絕塵院宇寬敞四時雜花木種種後有
古槐一株凌漢參天風流蘊藉儼若帡幪此槐蔭
書齋之所由名也委蛇退食時與幕友講論經濟
商確古今月坐風窗短吟長嘯季重接南皮之席
正平傾北海之樽幾無以過之矣抑余因茲有感
焉吾人躬膺民社大抵馳驅日長優游日少簿書
鞅掌形神況瘁當其嘯歌自適對良辰怡花鳥良
友相依忽不自知其樂也歛以王事見羈遷流宛

轉此如桔槔之在車中顛倒不能自制求如平居
之棲遲偃仰又安可得耶然則今日之柳鞞鶯嬌
其卽昇日之哀鴻萋楚也今日之調琴洗鶴其卽
移時之案牘輶軒也今日之把酒臨風其卽昇日
之衝煩觸熱也今日之曉露研硃暮烟催句其卽
移時之聽鼓應官而戴星走馬也嗚呼其亦可以
感矣雖然勞逸時也時吾無如之何也成毀學也
學吾所當自盡也古人仕優則學正以求吾所自
盡者耳可不勉哉余於齋之落成因思樂之不可

常恃與學之不可不勤誠能仕學相資棠蔭遍布
庶超然於蟻穴槐衙之表也爰筆之以爲記

新建文昌書院記

曾尚增
本州知州

世宗憲皇帝龍飛卽拔膠庠髦俊萃之辟雍越十有二年

歲在甲寅又

勅天下廣立書院取士之賢且才者教育其中今

上御極以來崇儒重道加意作人其立教書院之有成
效者

特諭督撫計年課最秉公保舉需次者不次擢用落職

平定州志

藝文

二十二

沾

者還以原官

聖恩高厚遠邁古昔而各省當事大僚亦皆仰體

聖心延師課讀冀有造就郡守以下又各於所屬建立

書院遴能文之士講習舉子業弋青紫以去者後

先接踵彬彬盛矣樂平古上黨地山水秀傑人文

蔚起自文獻莊簡諸公而外英流傑出代不乏人

邑乘所載皆卓有可傳癸酉春余蒞平定循觀風

故事進一州三縣之士而課之則見樂邑諸生恂

恂雅飭無佻達之習文亦平奇濃淡各成其才尤

者拔入榆關書院榆關書院者前牧華亭王公所
建也越數月定興鹿君師祖來宰樂邑他務未遑
文教是急慨然思建書院擇士之有文行者而教
育之顧樂處晉東爲邑褊小事關創始蓋難言之
邑有文昌祠舊開義學爲蒙養之所棟宇墻垣半
就傾圯而基址宏敞綽有餘地鹿君屬意者久會
邑之紳士來謁者議論及之知有踴躍樂輸共襄
盛舉之意以其意商於余余曰善勉力爲之鹿君
乃率邑之紳士有齒德者以爲之倡設法勸輸得

若干緡於是庀材鳩工相形度勢以古祠之舊址
爲白鹿之新規起樓閣以奉文昌之神開堂廡以
爲講肄之地或仍舊屋而葺之或闢草萊而益之
而束脩膏火之費則又爲之權子母而流通之自
是事成於肆業精於勤日課而月程思集而益廣
益有以發蒙山之秀啟沾水之靈矣雖然規模初
立籌畫方深源遠流長垂於永久則又在好義者
之協力勸勸以圖厥成也今事雖未竣而盛舉宜
勒貞珉會余返里有日而問記於余余旣嘉鹿君

之有志竟成且深爲邑之諸生幸所爲心甚欲以
不文辭顧神往而不自禁也竊願諸生勉副賢宰
崇文雅意誦孔孟之言佩程朱之訓經經緯史爲
明體達用之儒修家獻廷有用行舍藏之具於斯
舉也庶幾無憾而賢宰之藉手以報

聖天子者其亦有厚幸也夫是爲記

喬莊簡公遺集序

明 王世貞

當憲孝朝海內乂安人主意不欲競於武縉紳先生爭自致其力於學以報塞右文至意而獨長沙李太師石淙楊太保爲之冠太原喬莊簡公故嘗受經二先生門稱高弟子退而與北地李獻吉越人王伯安相琢磨爲古文辭甚著自喬公爲尚書吏部郎佐其長持平銓衡有大臣風業不以文士少年目之矣顧喬公之自喜爲詩文愈益甚其歷卿寺踐常伯出入兩都八座使事職業之暇多遊

平定州志

藝文序

二十五

沾

名山大川以廣其意所至輒遊遊輒搽奇剔幽有記詠題名之屬又旁究書藝八法喜延說後進不爲貴倨海內操觚之士延頸而望下風借標相重者比比然稍復疑喬公文士少實用云而會甯事起公以大司馬贊留守之重從容調兵食約束吏士大小受署奪逆王膽於數百千里外事甫定天子以其倖來公先幾伐謀抗死請鑰大奸惕息於肘腋之內而不敢動蓋前是石淙公數立功西北稱名將相伯安公縛甯濠策勲第一封侯伯而公

復建社稷之業於留都而後文士之用可知也嘉靖初天子進公位少保爲大冢宰虛已以聽公推轂耆舊一時彬彬朝之間前後建白軒舉國是而其所持禮不能勝新貴人稍不合卽奉身退高卧於介山汾水之間天下偉其去而望其復起卽嚮所稱長沙石淙伯安諸公視公於出處之際蔑如也公之爲大司馬不佞大王父實佐之而孫清簡公任大宰相過從驩甚公有鄉林宗之鑒先君子甫髻而侍公進之膝曰兒異日庶幾余哉則謂大

王父曰翁似不及也先君子居恆與不佞及公未嘗不津津言之也其貌頎然而偉長毅然而方温然而親人若傷詩云天降時雨山川出雲公庶幾類之哉蓋喬公歿三十又五年而今皇帝錄舊德加贈公少傅易名予葬又三年而不佞承乏晉臬首訪公家室則公之血胤絕久矣糾其遺文得十之一二歸而謀梓行之會清簡之孫世良者時丞崇明聞而捐俸共劊劂之役集成凡得詩賦四卷奏議又雜文六卷嗚呼卽憲孝間士大夫習公文

者將謂公寡折衝之略推遜介胄迨後習公留都
事者毋乃謂公木強持重少文無術如絳侯博陸
輩耶茲集行庶幾有以窺公全矣

右序俯仰今昔論世知人景慕情深乃早榮李
令輕忽志乘將喬莊簡遺集一序驀爾削去夫
存其序猶可因序以求書若並其序之不存則
北方之人竟不知弇州曾有是舉矣余幼時曾
及見白巘尚書與伯瞻郭進士唱和詩札以是
知金薤琳琅散落人間正復不少此在喬氏子
代弇州山人之博雅多情也

與喬宇書

章懋

伏惟先生以天生鴻碩若時登庸而才猷德望名
於一世訐謀樞宥之廷增重留都之勢朝廷之所
倚毗四方之所具瞻永綏宗社鈞侯萬福某夙欽
令聞恆切傾企思欲一瞻容色一聞緒論以慰鄙
懷而弗克如愿荷蒙盛德搗謙禮下時賜存問非

好善而忘勢者能若是乎昨歲門人董生歸自南
雍又辱鈞翰下頒加以香帕會錄之貺而獎與過
情且謂不肖享平格之壽三肅拜賜曷勝惶汗但
書所謂平格者蓋指商之六臣能保乂有殷格於
皇天而多歷年數故周公以勉召公而碌碌庸流
曷足與語於此哉此某所以再拜頓首而循墻遠
避也來教所言蓋先生之自道耳方今大駕遠巡
而前星未耀四方多故萬姓驚惶咸謂苞桑不繫
伏莽可憂惟恐變出不虞患生所忽中外所望以

扶持世教而康濟時難者惟在於先生而已先生
負有爲之志當可爲之時必將思所以廣儲蓄修
武備爲足食足兵之計求異材結民心爲制治保
邦之謀於以壯皇圖於不拔綿國祚於無疆則商
周諸公不得專美於前矣異時推保乂之勲而享
平格之壽者豈不在於先生乎因便布此以拜來
教之辱

送喬太常序

明 李夢陽

元年春天子肇祀天地既合羣神於南郊乃復遣使祠天下名山大川暨古帝王宗室王墓告始也書曰望于山川偏于羣神是也自山以西其鎮曰霍瀆曰河海曰西海帝曰媯曰湯宗室王曰晉曰代曰瀋則吾友太常少卿喬君往侍祠建節行蓋道并陘泝太行南並蒲坂反於太原北抵雁門雲中厯數月乃還往反蓋數十千里按祀典王祀四望天子始踐位祀之巡狩至其方則又祀之故公

羊曰天子有方望之事至漢宣帝令使者持節侍祠於是近臣始攝天子祀事而匭帛載御祝與百神抗禮矣祀之義有三一曰尊神二曰尚賢三曰展親夫晉代瀋所謂文之昭也媯湯古之神聖人也河海霍望也於是時將天子精意能靡所弗享非太常所有事邪太常掌百神之祀素行無醜於神明又晉之山川所生也夫三者備矣非太常享而孰享邪是故孔子曰我祭則受福言有本也山西連年凶赤野千里黍稷不植牲牢殯瘞百神之

典將有所不給今天子踐始遣俊臣往修禋事如是而復雨暘愆期甘澤弗降神曰失職賢曰助慝親曰悖德夫山川鬼神豈若是極乎子行矣予於是望之矣

辭文清公行實序

喬宇

濂洛關閩之後以斯道爲己任者寥寥其人在元則有魯齋許公靜修劉公國朝則有文清辭先生皆所謂道學之儒者是也先生嘗言學者讀書窮理須實見得然後驗於身心體而得之故其幼而

壯壯而老出處進退辭受取予之節無一事不求合於義在大理時權奸中傷則臨難而不避在內閣時義有所不合則見幾不俟終日在河津時隱居樂道則講學以淑後人傳曰富貴不能淫貧賤不能移威武不能屈者先生殆兼之矣如是而謂之儒者其無愧乎平生所著述若讀書錄續讀書錄諸書咸明白簡易力挽末學詞章之陋蓋其踐履精純言與行相顧匪若立異術奇高遠無補於世者所可論也或曰從祀闕庭凡立言行道有功

於聖門者皆取之若靜修與先生篤志聖賢之學
終其身而不變可謂有儒者之實矣而弗獲預非
缺典歟予應之曰歷代從祀之議有定於一時者
有閱數十年與百年之後而始定者要其極秉彝
好德之公烏能泯哉今議者輒以著述少之謂劉
靜修明道之功不如吳草廬辭文清講道之實不
如考亭諸弟子舉其一節而遺其全體非天下之
定論也夫生乎百世之下而奮乎百世之上不由
師傅專心正學所謂豪傑之士間世之才其有功
於名教也不爲小矣以之侑食廟廷復何忝乎聖
朝文運聿興重儒重道激勸風化之事以漸舉行
然則二先生之從祀恐終有不可廢者矣

重修文廟勸募序

王基昌

甚矣人心之好異也自青牛過函谷白馬來東土
而佛老二教興於周流於漢於是超拔因果之說
沁八人識田中牢不可破厥後招提蘭若洞霄琳
宮遍天下而緇流黃冠之言信若桴鼓語及尼山
聖人則似爲無所關切而漫漫也孰知自麟吐玉

書而水精之子繫衰周而素王位則不帝不王不相也德則亦清亦任亦和也師也而天經地義賴以不墜時也而敦化川流藉其傳衍秦而火不足燬也漢而雜霸不足亂也晉而放達不足蕩也唐而浮華不足靡也卽有宋西北用兵徵役不息而理學代興眞儒疊見我

至聖之垂教眞萬古不可磨滅超二氏而獨隆乎崇奉之典代有沿革廟貌之創或爲更變八大元而世祖有禁入孔廟之金牌至明季而世宗定去像立

平定州志

藝文序

三十一

沾

主之師號迄我

大清立教職隆禮典護至聖之宮牆及今

上幸國學設經筵崇古今之教澤則學校興舉尤宜先百廢而獨急也明矣邑侯王公江南名宿甓社英流每謁聖廟覩殿宇廊廡不蔽風雨危壁頽垣鞠爲茂草歛歎息者久之奈催科之繁簿書之勞一片苦心腸鬱鬱者二載幸而彫殘漸有起色矣庶政亦且就理矣迺下詢寒羶欲舉學宮而振起之昌也夙抱同心自愧力薄逢此盛舉勉爲勸助

凡我同人咸望竭力捐資毋曰我

先師無福以賜人也而我之閱閱家聲何以垂後裔我
之青青子衿何以超齊民天地何以不長夜詩書
何以牖愚蒙倫常何以常存人心何以不死繼往
開來箕裘永衍孰非我先聖前賢之修定刪述默
佑提撕之神功乎其視二氏之以虛誕惑世禍福
誘人相去奚止徑庭則積金玉成瑤臺攢眾繪完
美錦願同人之勵之也其有敦而樸穎而異父老
野叟知慕吾道者些須之助亦聖教之所不外也

平定州志

藝文序

三十三

沾

沾城書院課藝序

儲麟趾

沾城舊無書院自余同年陶西圃尹樂邑下車未
半歲卽創始焉先是君以翰林出尹武强洪洞所
至民咸安之聽訟之餘輒進諸生講論文義至日
移晷無倦容以故兩邑士愛之如慈母復戴之如
嚴父焉今樂又介燕晉之衝直軍書旁午日無甯
刻而君又輟簿書之暇 講指畫以振興士志猶
夫武强之與洪洞也可不謂難歟又况捐俸精葺
垣舍擇師以立之表督課以嚴其規弊賞以勸其

成宜乎樂之士咸愛之戴之歡欣鼓蹈不自知其月異而歲不同也昔昌黎官於潮不鄙潮之士而教之子厚官於柳不鄙柳之士而教之昌黎更以進士趙德爲之師兩州嚮化革面迄今遂爲文獻之邦皆由二公之教啟之矧樂之爲邑去

京畿僅八百餘里地雖僻而風尚猶淳役雖繁而人思自勵君又嚶咻而惟恐傷之俾之奮發以日進於善方諸昌黎子厚之治潮與柳意豈異是歟仁和楊子雙橋泐東名士也其文章行誼與西圃夙訂相知之雅適來主斯席旣匝歲矣欲先梓課藝之尤者若干篇以勵方來旣爲文以弁其首予因本其意而爲之序

沾城書院課藝序

楊廷杓

歲丙子予自都門就西圃陶使君聘來山右館於洪洞官舍課其哲嗣時雨時中因得於講業之暇與使君樽酒論文致相得也君以清華妙選烹鮮劇邑時值軍需旁午脚靴手板無停晷而雅意作人尤以振興學校爲己任凡執經而前者雖簿書

冗雜皆得以時請業爲之口講指畫弗倦以故士多暇就而得其解者悉破壁以去丁丑春君自洪遷樂平樂僻邑也敦詩書而說禮樂由來舊矣君至欣然進諸生而親校之拔其尤者若干人葺沾城書院俾肄業其中每課必手定甲乙多方獎誘久之念所轄栢井郵舍爲晉東首衝鞅掌不遑因捐俸延師督課而予遂自官舍出主其席夫人情莫不私其子而君以所期於其子者移而屬之一邑於樂人十意誠厚矣方今

平定州志

藝文序

三十五

沾

國家文治光昌書院之設遍天下樂雖山陬然蒙山之秀沾水之靈鍾爲偉人若楊文獻喬莊簡諸前輩風規不遠予固知君於樂人士期待者又非淺也予忝講席載餘矣日與諸生處悉謹樸無佻達風予旣愛其士習之淳而校閱其文雖所見不盡同或則循循矩矱或則矯矯風期要皆不離清真正雅者近是日月再逾課藝漸富予擇其尤雅者得三十餘首付之劄劄以示鼓勵噫邑而劇君之造士不懈豈邑而僻而劇君之造士顧或懈乎治邑

如烹小鮮信乎游刃有餘矣顧予所與諸生期者君不以劇忘士士何可以僻自安繼自今益勉其未至以企前徽而追大雅庶無負使君惓惓樂育之意也夫

送喬廣文歸里序

陶

鏞

本縣知縣

憶丁丑春余自洪洞調任樂邑適鄉甯喬先生奉檄司鐸於茲年高貌古知爲文壇名宿蓋心折者久之其時余方重整沾城書院時集諸生會藝先生勤加董率每課必勉以學古通經諸生亦爭自

平定州志

藝文序

三十六

沾

淬礪以故邇來風氣駸駸日上頻年科甲聯登作育之功實維先生共襄茲事夫

朝廷設官所以爲民而士爲四民之首薰其德而善良故教化行實有以補司牧之所未逮此余與先生足誌一時相得之盛也今禮闈

萬壽恩科廣錫類之仁

特諭吏部直省學官年逾七十者概予休致所以優耆長重師儒也部牒下而先生之名與焉明經而邀曠典昔人所謂稽古之榮者其在是與惟是數載交情

一朝送別僚友固切懷思多士尤爲眷戀臨行將
有事於餞別諸生丐余屬詞以贈余維蘇湖設教
名播當時苜蓿堆盤清搯自古此舉也諸生旣恤
其行李之困復重以繫維之情知非徒飾虛文也
蓋臨別而思教澤則沐澤必深去任而知戴德則
感德倍摯先生平日無赫赫之行而有去後之思
信有實行之可徵矣故不必侈陳溢美以掩先生
之眞第摹夫多士思慕之情爲質言之曰先生之
於樂邑也在眞能得土也云爾

平定州志

藝文序

三十七

沾

公祝李邑侯

張世榮

浙江
解元

雲間王公之牧平定州也鋤頑馴梗上善崇德欲
以文學倡化是邦而所屬縣若孟邑徐侯壽陽張
侯樂平李侯咸彬彬儒雅質有其文於是遂相與
建立榆關書院萃州邑之秀者讀書於中而余適
謬主其席因得納交於三君子而李侯把臂爲最
早今壬申之五月邑之紳衿以李侯誕辰來告將
升堂効祝而乞余言以爲壽且曰前公之任營山
也不爲鈎距燭事豁情巨蠹積奸披露首伏而人

頌神君仁心爲質保障羣黎麥秀兩岐桑間雉馴
而眾稱慈父且也尊文崇儒角藝選材汲古味道
膏潤白腹文師日雄拔幟省會而士風甲於蜀都
故其去也無童髦慧駿咸咨嗟涕洟攀轅翼轂提
榼挈酒奔送恐後若是者綿數十里而奇今公之
至我臯川也因其土風順其俗習恬淡甯謐與物
大適欺誣屏絕詐僞不作獄無滯罪案無留牘教
孝教弟去袞去邪睦姻任卹咸歡於古歲在戊辰
蜀番寇躡逞厥螳臂抗我

平定州志

藝文序

三十八

沾

王師

天子震怒命相督征雲梯虎士乘傳星馳而三晉適當
其衝栢井爲驛之首站羽書旁午軍使絡繹雷騰
雲奔餽夫畢力疲於奔命公乃捐資協理身任劬
勩閭閻無驛騷之苦師行過枕席之上今又歷數
年於茲矣我有耆長惟公噢之我有童稚惟公孩
之瘡痍疾苦公摩其肌流金折膠公夷其咨讓畔
讓路道不拾遺分飴共茶民敦禮節如痿得起如
盲得瞭下瑞生祥惟公所召矧公議道自己不侈

言教高堂鮑太夫人年八十餘矣而公恪敦孺慕
視聽希夷養志養體是以太夫人神明不衰而色
力增壯雖公恆言不稱老而七月中元後一日爲
公懸弧之辰卽太夫人誕育子之辰也其能不持
南山以祝耶余曰君子之觀人也察其言則可以
知其中之所存而按其所設施則可以券其言今
侯辭業通敏溫藹翔洽而又跡其措於蜀於晉之
卓卓著功業可紀者其古文翁郭伋之流亞歟昔
歐陽公作海陵許公東園記以爲許氏孝弟著於

三世凡海州之人化其善者無遠邇今侯自先世
清白貽謀累仁積德而侯又世久而愈篤其美以
祖父之仁厚化及鄉國者移而型於蜀於晉則與
許氏之力持而不息以止者無所與讓僕雖不文
固將跡侯之所以自壽而不朽者墨之屏障並以
質之雲間公知亦非誣譽頌禱之詞也夫是爲序

喬烈婦傳

明大學士
吏部尚書 李東陽

烈婦高氏其先燕人前都督志之孫女故工部侍郎樂平喬公諱毅之側室也公夫人王氏既卒高侍公勤公邁疾湯藥必躬視口不甘食夜不就寢每稽顙於天祈以身代公疾革顧謂之曰吾殆不起吾子孫必克自立獨汝年少又無子奈何高泣曰公脫不諱妾固當死從公地下耳公卒哀毀殊甚引繩欲自縊爲家人所制不得死乃取平生華飾投諸火而示無生意於是防者日嚴公子兵部

平定州志

藝文傳

四十

沾

郎中鳳扶柩歸高氏自京抵家悲號益甚聞者愴惻竟以間縊死柩旁時年三十有三而已死之日適朝廷遣山西布政使胡欽諭祭公胡聞其事嗟嘆不置知縣劉義以狀聞請表其節以勵爲人婦者下禮部移御史及布政按察覈實如義言詔旌其門曰貞烈後寶坻王子玉爲知縣卽邑中隙地構祠祀之祠亦曰貞烈彰國典也予嘗觀中書舍人楊甯應所著祠記聞高氏爲詳郎中君既卒其子孫學生宗進士宇從子醫官憲請爲傳立石於

祠以詔其子孫故書之太史氏曰世稱慷慨殺身
易從容就義難信夫夫臨事值難義激而氣動雖
中人之質蓋有視死如歸者矣及事勢稍定情得
以自施美利在目甘言在耳無重賞以誘於前嚴
刑重罰以驅其後其不逡巡退縮自恕而不覺者
豈不鮮哉世固有相約赴難不終夕而已倍者况
積日閱月愈久而不變耶吁身爲人妾命不錫朝
不與心誓身決以求必死之爲慊尤人所甚難者
世又有以小官末職自諉不力於君父之難何哉
遠矣

平定州志

藝文傳

四十一

沾

喬職方傳

明吏部
侍郎王鴻儒

兵部職方郎中喬公太原樂平人也名鳳字廷儀
自入世祖福已有聞於潁里六世從祖曰思義者
預爲壽藏五世曰弼者建潤德堂藏有記堂有詩
皆元呂左丞思誠作也祖鑑仕爲平谷湯陰二邑
簿父毅正統六年山西鄉試第一十三年舉進士
累遷工部侍郎公少穎敏五六歲時侍郎公口受

尚書輒成誦以至終卷雖在華屋 襦之間而能
斂約自持一意問學受業於莆田顧孟喬執經問
難不間寒暑有疑輒跪以請一時同門好學者皆
自以爲不及侍郎公使晉公侍行晉王見公秀偉
愛之欲留以爲儀賓公密白侍郎公曰大丈夫當
自樹遠圖安用此富貴爲侍郎公笑曰吾意也事
遂止景泰七年舉於鄉明年天順改元舉進士時
年甫十九觀政兵部四年除武選司主事用勤慎
聞成化二年遷員外郎未幾以母憂去五年服闋

平定州志

藝文傳

四十二

沾

還舊官八年進郎中明年侍郎公捐館公復解任
十二年服闋改職方司職方劇曹所掌乃經武禦
戎大計公用李衛公籌邊舊法揭圖座旁朝夕觀
之由是四方之山川城堡斥堠遠近險夷厯厯在
目故凡推用將校指授方畧咸當才用而合事宜
一時廟謨大有裨益十六年奉使廣西時倣報頗
亟公心憂邊思職重違曹署遂馳冒暑雨晨夕倍
道不三月而還以過勞居一年卒年僅四十有三
公素孝養親疾侍湯藥衣不解帶居喪哀慟盡禮

扶襯還樂平山谷險隘或躬執紼治塚之役雖出於官恆爲相力給食故無怨者庶母高氏爲侍郎公死公痛視生母襄事卽白郡縣上狀詔旌爲貞烈之門世父老事之如父兄鸞早世撫其孤俾皆成立齒宦籍母夫人王氏有兄弟二人世居樂平橫山村困於徭役流徙異鄉不知音耗者數十年公懷念不置母歿悲思尤切後訪得之已占籍河南鹿邑卽迎至京居月餘乃還自是每一二歲輒迎以爲常姊老在樂平亦迎奉數月衣服飲食周

平定州志

藝文傳

四十二

沾

悉備至不異母在時公性行淳樸不事矯飾徑直自信雅度豁如善交際不爲形迹與物無忤處懷恒過於厚甯人負我毋我負人尤篤故舊欵洽傾倒至忘官勢宅憂日值歲荒儉家雖無贏貲鄉人有稱貸者必酌量多寡與之多所全活或不能償亦不責報使廣西時行橐清肅自公廩外故舊有所餽遺一無所受居官留心政理不問家事凡營辦貿易未嘗經懷平生教子甚嚴邃菴楊先生爲中舍時經學行誼聞天下四方從遊之士響臻雲

集公之二子實在列焉夫人路氏柔靜貞慈自幼通列女傳小學諸書大義稱賢配焉子五宗宇宜宸寀宗字本大尚寶卿字字希大今南京禮部尚書并顯於世論曰予讀南史謝宏微傳見其以江左華胄晉世名家不以風流自命而崇尚儉素篤厚倫紀在家在國穆然無間其卒四十二歲官止侍中宋文帝嘆惜甚至謂領軍劉湛曰謝宏微年踰四十名位未盡其才此朕之責也觀職方亦席籍高華而無貴介侈靡之習所以居身馭物者其

平定州志

藝文傳

四十四

沾

孝謹之行友睦之風慈儉退遜之德實無愧於宏微至其卒也亦僅差一歲名位不進則西涯李公柳溪周公邃菴楊公皆惜之比之宏微亦未爲不見知也宏微子希逸復有奇才盛名當時以藍田生玉稱之今公之子之賢又豈讓希逸哉後希逸子孫與六朝相終始史以爲積善之報跡職方公蹈履所謂積善者非耶其來葉繩繩知又可並矣

趙運使孝子傳

明 馬可侍 教諭

趙恒臯落里人中嘉靖乙卯鄉試家貧事父母極

盡其孝父終哀毀逾禮思欲廬墓以母在不果會
試赴都聞母感疾星夜馳歸而母已捐帷幄頭觸
門扉幾斃良久始甦勺水不入口者累日遂鑿穴
墓側朝夕哭奠一如初喪親妻孥罕見其面三年
不懈手植松百餘株縉紳歌詠其事爲孝行二十
四感集傳於世歷任州郡太守運使等官苦勵清
節宦遊二十餘年不攜家眷惟一二僮僕自隨謝
政家居僻處深山中不入城市年近八袞精神不
減少年人謂純孝清廉之報云

平定州志

藝文傳

四十五

沾

趙大司馬仗節小傳

增訂

明

許大受

太常寺卿

大司馬趙公諱紱號懷東大原府樂平鄉臯落里
人幼有至性能孝病母事嚴兄卹嫠字孤種種過
人及成進士令盧龍會有兵警悉發官廨中供億
貿飭干陬循良之餘邊方騰譽則謹勾稽絕請托
厥聲籍甚擢南侍御屏絕門戶多名建白史不勝
書屢遷南北銀臺會兵薄都城直以喉舌心鎖鑰
極殫夙夜先帝嘉之以拂魏璫意令護瑞藩之國
公能峙糗戢橫因擠致功晉少司馬因科臣劾其

加銜不繇會推上疏力辯之略云漢中之行人皆爲臣難之臣所難者正不在外而在內不在漾水之波濤而在人心之叵測又不在深山之虎豹而在當道之豺狼遂因病乞休焉上謂其情詞切懇俯遂其志及予告後復沐温旨加正卿煌煌異數蓋嘗明試以備邊衛闕之能而欲大用公也歲癸酉流賊寇晉蚩蚩黃齒咸閭室戶而夷太行公獨屹然不動穆然深維曰吾村係樂平要害一村搖動閭邑風靡大臣先奔細民安恃若民去粟委賊

平定州志

藝文傳

四十六

沾

據吾粟以攻城城無守兵其勢必破樂平破則自北而上平定等州縣皆不可保惜我身家而縱寇以憂君父何司馬之爲於是罄數歲所儲粟給民拒寇又大書賞格牌以鼓民勇壁壘頗壯奈賊七營齊擁匝地瀾山休司馬無斬狗之柄不免潰去非方略不精也賊執牌以獲公恚公扼已然又欲致公右袒舁八座就公羅拜請乘願聽公之命公瞑目罵曰賊子無知吾恨不得殺若肯袒若乎延頸受刃舌戰逾時而詞色益壯北向叩頭曰臣殺

賊有心除兇無力何以生爲向石崖聳身直下賊
乃驚嗟散去越旦得公石罅中倒懸巖阿息如絲
綴而兩股不隨矣賴鄉之丁壯以木板卧輿入城
踰旬竟逝嗟乎公之顛沛何人不慘獨念公時方
家食設肯少避兇鋒例無失事之譴而公必不爲
彼而爲此者非臣之純忠之盛豈易臻此而勝任
乎公之家誠不足惜幼子之舉之基暨烈冢婦張
出兩孫相繼歿歿非天道難謀也疾風知勁自古
記之而何獨公哉頻年殉國諸良有以儒知兵以

寡禦眾而名垂竹帛者殆聞趙司馬之風而興起
者耶抑聞之流寇之說公有言方今之時當道不
能擒賊鄉官欲滅賊乎此固不識人倫之狺吠然
有以知鄉紳殉國更難於當道矣假令公被難而
不死難先是之不遁孰留之見危之不屈孰鼓之
哉是可以見大司馬矣

趙參政忠孝傳

李榕

嘗聞求忠臣必於孝子之門家有嚴君國稱君父
此孝經一書不必別言忠也故有少年溫清未及

從王而識者早以公輔相期抑名臣忠愛聲施爛然而後人取其家事論之以爲豪傑之流莫不本於至性耳乾隆癸酉春重鐫樂平縣志臯落里趙生翀持其伯曾祖之璽壙記並忠孝遺行丐余載入邑乘以光泉壤余義不獲辭爰哀集而傳之公字如石號坤揚大司馬之嫡子明天啟甲子解元也自兒時便有不羣志每詔諸弟曰吾爲闕閱長子細行不矜貽羞匪細一意亢宗砥行以承厥考而率諸昆不惟諸昆凜兄若父卽鄉之更老早以

聖賢期公此固作法者之庭訓亦克家之才品有以成之也於是文譽日隆試輒冠軍旋拔明經領解額素敦孝友事母閻氏與繼母李氏能將順其已形曲體其未著惠愛諸弟訓迪殷勤得古人友于之誼待族之長幼暨遠而親友故舊莫不恩以相接義以相維生平醅恪在醜不爭獨當大節大倫挺然不讓蓋不待生死當前而忠孝至性已見於庭幃聚順之日矣崇正五年冬流寇肆虐禍慘桑梓大司馬仗節拒賊公承父命發粟書牌鼓勇

登先初與眾約領西山瞭任而大司馬駐北山統眾及事急則棄西瞭而專北殉目不顧踵遭萬丈陡崖而顛若穎考叔之螫弧也死一晝夜復甦賊挾公抵第索鏹無以應復兵之且灼之瀕死浹旬天幸仍活方苦塊間賊又驀至時僅一蒼頭掖公走假令此時痛定思痛甯不棄死偷生公乃去而復返從容諭諸弟曰事已至此吾決不生縱吾生而先君之柩不保卽萬死不足贖罪遂以身蔽柩哀號震天賊不知公爲何許人刃下如雨血成泉

而肉將醢矣公又從容曰吾不怖死待吾一言吾本甲子解元遭爾輩慘蹂幾殊死者再四甯不愛生所以不偕眾逸者徒以父骸在柩耳爾肯留一椽不燼以全父柩吾瞑矣語未畢一賊擲刀扶公臂熟視曰幸爾臂可續何不早陳此情使吾幾殺孝子聲傾三晉巡按余公特薦於朝謂才媿班馬行法閔曾大節不奪尤徵豪傑而卜名世云元配張氏抗節而亡其正性勁氣足貫金石何莫非公之孝義有以潛孚而默化之也後司鐸澤州立程

課士儲才甚多廷推虞部郎中國事旁午夙夜靖
共不遑啟處由是績著廟廊欽授河南叅政奈束
載未成闖逆陷京公義不屈賊爲賊刑斃與國偕
亡且閨教素嫻一妻一妾視死如歸同自經以殉
之順治五年歸葬於臯落之祖塋嗚呼患難必爭
其方寸而跬步不傷其本原古之人捐階焚廩道
已備於可殺可生植璧秉珪義祇盡夫全歸全受
絕裾風雨者孝子之苦心色養窮山者忠臣之變
節若公之純孝忠貞君親兩無負者洵足彪炳宇

平定州志

藝文傳

五十

沾

宙掩映古今載之邑乘雖與日月爭光可也

李雲文孝友傳

錢塘

王延年

國子
司業

孔子云宗族稱孝焉鄉黨稱弟焉夫士品以才德
兼全爲上而次卽及於孝弟者蓋孝弟之德通於
神明光於四海大之王者治天下之要道下之布
衣鄉曲之士亦可以竭誠力行而顯名當代垂法
後世此其所以爲庸行之常而隨地隨人自盡者
也迨後讀漢書見毛義辭包之行事慨然想見其
爲人今門人李斯陶持其祖父天章先生家傳示

余嗚呼孔子之言信而有徵讀其傳者孝弟之心其油然而生耶按先生名雲文字天章樂邑次貢生生兩月父亡三四歲凡得鮮物奉母後乃敢食承顏養志甘旨不絕遇生辰出里門外亦必衣冠遙祝有二兄事之如嚴父長早卒所遺寡嫂弱姪代謀生理親課讀書次剛猛從容婉諍冀其免患嘗遊南方先生忽心動默禱天祐而兄於是時失船墜水得救乃出精神相感在千里之遠若此壬寅歲祲稱貸供養次兄所餘賑恤鄉人藉其米粟

平定州志

藝文傳

五十一

沾

而存活者甚眾學憲劉以孝友優行旌獎郡縣公舉賢良方正而先生以遘疾卒聞嗚呼先生可不謂孝友著於鄉閭者耶夫後漢多節義之士大都孝友著於家庭以故忠誠行於鄉國自毛義薛包外若郭林宗所敬禮訂交如茅容者何可勝數先生固毛義薛包茅容之流亞也余雖品隲人倫遠謝林宗然景慕高風亦樂爲之傳其至行云

趙孺人貞烈傳

喬名儒

孺人出邑世家拔貢豁然公女生多痰嗽疾而質

性聰穎幽貞天成列女傳及書筭等藝略能通曉
父母皆鍾愛焉年十六歸生員善昌李公翁姑咸
稱其孝越歲其姑故其翁宗寰公年邁七旬孺人
善孝養時脩甘脆親奉湯飯八年如一日後家業
漸就彫零善昌公惟嗜詩書拙於世事累膺里老
之役孺人罄奩佐之無少吝意中年而寡或乃危
之曰值此家產剝落輸將重業二子又皆幼穉旣
無伯叔終鮮兄弟垂憐護持甯有誰人孺人泣應
曰自有天命我自爲之自是夫柩十年停堂未能

營葬而孺人知復業以教子爲先二子微有不遜
卽向夫柩前泣且訴曰某事某件爾父所抱憾也
某莊某田爾祖所創置也汝曹忍蹈暴棄捐廼祖
父故業哉惟刻意教子半爲征租納賦半應日用
人情幾竭心力之不遑矣迺其靜處幽貞耐飢寒
尚儉樸女工時不釋手又若漠不經意也曾遭凶
歲野蔬淡飯陶然自得而待賓享先初不作寒儉
態每歲秋移居茨峪經理田事往過其境者常見
雞犬桑麻肅然整齊較他處有別而孺人饒有餘

閒俯仰自適而已當其時耕戶佃僕莫不欣然勤事強奴悍婢靡不俯首聽命凡此智慧以濟志節果其天生獨異與抑亦操心危而慮患深志節既定而才智因以日出與迨二子時楚俱入泮孺人心力少寬每過良辰佳節偕一二親故盤桓竟日及丙戌復柳泉等業夙志已遂正宜享有大年優游卒歲乃於丁亥暮春帶病寓泉歸家七日而逝焉嗚呼痛哉孺人以多病之軀閱歷於艱辛憂危之時精神不懈至故業復而旋亡或天哀其苦節

強持至今以觀厥成與余與孺人係先世故戚其節操德行知之洞悉敢不謹述其始末乎噫婦人之置先業於罔聞羨富貴而背夫他適者俗以爲常而讀書輩亦忝不爲恥若孺人之不怕飢寒不憚辛苦不畏孤單門衰祚薄而教子成而夫志全真足以振綱常而挽頹風也猶憶孺人孀居時曾手植孤松於峪之舍旁多歷年所未嘗生發一枝而幽貞疎古淡樸自如明明衰病之態堅貞之狀也於丁亥春倏然而枯與孺人並逝真屬奇應廣

文張先生聞而賦之曰一生良友惟明月千載知
心在柏舟余於孺人亦云

高母陳孺人賢孝傳

李早榮

本縣知縣

余治樂之三年丙申冬續修縣志採訪孝孀賢媛
漸次補刻以維風教適邑紳士咸稱高門有陳孺
人者乃榆關歲貢生正之公諱心女賦性幽閒幼
嫻內則二十歲歸於高爲邑庠生森然公諱大林
繼配今孝廉定之親母也森然公於兄弟行四孺
人于歸時已分居於鄉太翁太母皆就養焉公天

平定州志

藝文傳

五十四

沾

性肫摯凡父母所鍾愛之人時留養於家以承堂
上歡孺人亦善體親心克成夫志雖并曰親操晏
如也於翁姑前每食必問所欲將徹必請所與森
然公經營外務在家日少孺人脫簪解珥不使甘
旨少缺及翁姑老而就衰手不能舉足不能行者
十餘年孺人扶持吮摩必躬必親毫無倦色是以
兩尊人頤養天年皆壽近耄期堂姑趙氏寡而無
依孺人事之飲食供俸如親姑然趙氏因得享壽
八十四歲而終姪男姪女中有失恃者皆孺人撫

成之長養婚配罔不如禮方孺人之來歸也前二子惠慶及女一俱屬孩提而慶尤在襁抱患瘡痍孺人撫恤周至疾痛疴癢靡不關心及生子定與前子視之如一食必同席寢必同被用是前子前女亦怡怡然不自知其母之亡也森然公患病十有三載家業漸消孺人親率婦女各勤女紅以營生定甫識字卽篝燈課讀不少姑息及定入泮適森然公見背止遺山田數十畝孺人以前子讀書未成盡付之謂定舌能代耕可無需此孫三人俾

平定州志

藝文傳

五十五

沾

隨定度日以便親爲恩撫曾諭定曰兄弟之子猶子也須善視之勿忘乃父遺訓且爾身列名教更不可恃母而驕若與爾兄一着形迹人言責在爾矣以故樂邑前遭饑饉轉徙過半高氏以赤貧之家兄兄弟相顧無恙皆孺人之慈訓所致也今孺人往矣願乞一言以光邑乘余聞之肅然起敬竊嘆烈女節婦載在前誌者固代不乏人如孺人之孝慈兼盡內外無間者究不少概見况家本寒素時際難辛而修內職於勤苦之會保子孫於中

落之秋非惟和氣盈門使老幼各得其所且策子
定勵志讀書領辛卯鄉薦文行卓越爲一時名宿
現在赴部侯銓指日文章報

國以光前人跡其淑德懿徽又豈僅坊表巾幗也哉則
孺人誠可風矣爰揮毫而爲之傳

楊文獻公神道碑銘

金 元好問

自孔子考四科及中人下上之次故孟軻氏於樂
正子亦有二之中四之下之說蓋人之品不齊而
論人之目亦不一有一鄉之士有一國之士有天
下之士有一代之士分限所在不能以強人而人
亦不能躡等而取之也維金大定已還文治旣治
教育亦至名士之舊與鄉里之彥率由科第之選
父兄之淵源師友之講習義理益明利祿益輕一
變五代遼季衰陋之習迄貞祐南渡名卿大夫布

平定州志

藝文 墓表

一

沾

滿臺閣若胥莘公和之之通明張左相信甫之樸
直張太保敬甫兩趙禮部周臣庭玉馮亳州叔獻
王庭州從之李都司之純之儒學王尚書充之李
都運有之兩楊戶部正夫叔玉李坊州執剛之吏
能張大理晉卿之平恕商右司平叔之雅量許司
諫道眞陳留副正叔之直言極諫康司農伯祿雷
御史希顏之剛稜疾惡累葉得人於茲爲盛若夫
才量之充實道念之醕正政術之簡裁言論之詳
盡粹之以天_{之人}學擴之以師表之業則我內相文

獻楊公其人矣識者以爲中國之大平治之久河岳炳靈實生人傑非宏衍博大之器如公者曷足以當之降才爾殊最繭斯允商畧前後擬倫名勝惟其視千古而無愧是以首一代而絕出然元光正大以來大夫士推公爲中朝第一而不以百年計之者知公爲未盡與公諱雲翼字之美楊氏其先贊皇之檀山人六代祖忠客樂平遂占籍焉曾祖處士君青嗜讀書而不事科舉嘗誨其子孫言聖人之道無他至誠而已誠者何不自欺之謂也

平定州志

藝文 墓表

二

沾

蓋誠之一物存諸已則忠加諸人則恕是道也出於人心誰獨無之然則山野小人有能行而世之才智士大夫或有愧焉吾百不及人獨此事不敢不勉耳若等能從吾言真吾子孫也祖郁用公貴封正議大夫祖妣宋氏追封宏農郡太夫人考恆累贈中奉大夫妣李氏宏農郡太夫人公資穎悟初學語輒畫地作字八歲善屬對日誦數千言弱冠登明昌五年經義第一甲第一人進士詞賦亦中一科特授承務郎應奉翰林文字考滿留在任

承安四年出爲陝西東路兵馬都總管判官決獄
寬平大爲總管賢宗室長壽所知泰和元年召爲
太學博士丁內艱服除授太常寺丞兼翰林修撰
六年南鄙用兵以本官從左丞揆軍駐汴梁明年
授上京東京等路按察司僉事初宰相奏是職章
宗先已識公卽可其奏曰得之矣召見咨以當世
之務稱旨及陞辭諭之曰卿至官有所建明當專
達毋枉執事者又明年改上京臨潢等路按察司
僉事兼本路轉運副使大安元年翰林學士承旨

平定州志

藝文 墓表

三

沾

張行簡薦公才學優贍精於術數召授提點司天
臺兼翰林修撰禮部郎中崇慶元年以病得請歸
鄉里貞祐二年有司例上官簿宣宗閱之記公姓
名起授前職兼吏部郎中三年超禮部侍郎兼提
點司天臺充賜宋國歲元國信副使四年西北兵
由鄜延內侵潼關失守朝議以兵部尚書蒲察阿
里不孫爲副元帥以禦之公奏阿里不孫言浮於
實必誤大事不聽兵卒大敗如所料六年遷翰林
侍讀學士同修國史禮部司天兼職如故有旨官

制入三品者例外除以卿遇事敢言議論忠懇故特留之以便咨訪卿宜悉吾意也時右丞相高琪當國昵信小人多變舊章權貨提舉司王三錫奏請權油高琪主之甚力詔集百官議其事戶部尚書完顏天寵輩百餘人同聲贊可公獨引趙秉文時戩等三數人排其議謂果行此事是以天下通行之貨爲權貨私家常用之物爲禁物自古不行之法爲良法竊爲聖朝不取也議遂格高琪怒公爲異竟以事譴公公不之恤也興定二年拜禮部

平定州志

藝文 墓表

四

沾

尚書兼知集賢院事五年築京師子城役兵民數萬夏秋之交病者相枕藉公提舉醫藥飲食躬自調護多所全濟城成進官一階四年改吏部尚書且有後命卿聞望舊矣今以選曹授卿宜振肅紀綱盡革前弊朕之待卿尚當不止此耳公泣政裁畫有方凡軍興以來入粟補官及以戰功遷授者事定之後有司以爲程式或小有不合一切罷去公奏從寬收錄旬月政成不動聲色而姦吏爲之縮手朝譽歸焉九月上召戶部尚書高夔及翰林

學士趙秉文於內殿皆賜之坐問以講和之策或以力戰爲言上俯不樂者久之公徐以孟子事大事小之說解之且曰今日奚計哉使生靈息肩則社稷之福也今日奚計哉上色乃和十一月改御史中丞宗室承立權叅知政事行尚書省事事有不法者大臣以爲言詔公就鞠之獄成廷奏曰承立所坐皆細事不足以累大臣然聞之向西北兩敵合兵來侵平涼以西數州皆陷承立坐擁強兵瞻望不進鄜延帥臣完顏合達者以孤城當敵衝

且能敗其前鋒合達之功如此承立之罪如彼願陛下明其功罪而賞罰之則天下知所勸懲矣其餘小失何足追咎承立由是免官而合達遂總機務五年以疾求解復爲禮部尚書兼翰林侍讀學士元光二年復申前請宣宗不能已許焉哀宗卽位圖任舊人首授公攝太常卿正大元年復翰林學士詔集百官議所以省費者公以爲省費小事一戶部司農官足以辦似不足議樞密院專制軍政蔑視尚書出政之地政無大小當總其綱領付

外施行今軍旅之事宰相或不預聞欲使軍民利病兩不相蔽得乎故獨以此應詔二月復爲禮部尚書兼侍講明年設益政院於內廷取老成宿德充院官極天下之選得六人而公爲選首名爲經筵實內相也每召見公獨賜坐且呼學士而不名也初命講尚書公爲言帝王之學不必如經生舉子分章析句但知爲國大綱足矣因舉任賢去邪與治同道與亂同事有言逆於汝心有言遜於汝志等數條一以正心誠意言之敷繹詳明上聽忘

平定州志

藝文 墓表

六

沾

倦尋進萬年龜鏡錄聖孝聖學之類凡二十篇公見朝士廷議之際多不盡所欲言上下依違寢以成俗一日經筵畢因言人臣事君之道有二有所謂事君之禮有所謂事君之義禮不敢齒君之路馬蹴其芻者有罰入君門則趨見君之几杖則起君命召不俟駕而行受命不宿於家是皆事君之禮人臣所當盡者也然國家之利害生民之休戚一在敷陳之間則向所謂禮者特虛器耳君曰可而有否獻以成其可君曰否而有可獻以替其否

危言正論期於益國補民而已言有不從雖引裾折檻斷鞅軻輪有不恤焉者當是時也若姑狗事君之虛禮而不知事君之大義阿合取容國家何賴焉上變色曰非卿朕不聞此矣公自興定元光間病風痺至是稍愈上親問療之之術對曰無他但治心耳此心和平則邪氣不干豈獨治身至於治國亦然人君必先正其心然後可以正朝廷正百官遠近萬民莫不一於正矣上矍然知其爲醫諫也十一月夏人和議成遣其徽猷閣學士來議

平定州志

藝文 墓表

七

沾

互市及振危急者數事數往不能決并求大臣面論之朝廷以公往議乃定四年知禮部貢舉以考試勞心邁疾明年八月之七日薨於私第之正寢春秋五十有九累官資善大夫勳上護軍爵宏農郡侯諡曰文獻娶呂氏封宏農郡夫人子男二長曰樸前公卒次曰恕擢正大四年經義進士第女一適巨族初公娶胥氏左丞通敏公之孫平章政事惠簡公之女以事姑嘗有後言卽日棄去不以相家子爲難二弟仲翼備極友愛家貲悉推予之

至百負之而不恨嘗與人言昆弟之間若以昆弟待之則容有不可堪忍之事但當以父母待之耳或以爲疑公曉之曰父母吾不得而見之得見兄弟非父母而何此念一生雖百世同居可也一姊適李氏旣寡挈孤幼來歸公處之官下在律疏屬及外親留任所滿百日則徙他郡避嫌公言之朝獨得不徙撫導二甥卒爲名士其長庭簡者登上第公天資雅重自律爲甚嚴而其待人者寬以約交分一定死生禍福不可變爲天官爲春官爲翰長

爲太常文章與閑閑公齊名世號楊趙高文大冊皆出其手典貢舉三十年門生半天下而於獎借後進初不以儒宗自居所以教誘之者率君子長者之事益其所未盡而勉其所可致苦言至戒或寓於歎曲周密之間異時想聞風采若龍門之峻朗出天外及一被接納則又恨造之之晚也平居無事左右圖史澹然無所營及當官而行或論列上前慨然以天下事自任知無不言言無不盡確乎有不可奪之節古所謂君子有三變者於公見

之貞祐以後主兵者不能外禦大敵而取償於宋故頻歲南伐有沮其兵者不謂之與宋爲地則疑與之有謀進士至宰相於他事無不言獨論南伐則一語不敢及公爲太學博士泰和初建言便謂宋不可伐國家之慮不在於未得淮南之前而在於旣得淮南之後蓋淮南平則江之北盡爲戰地進而爭利於舟楫之間我之勁弓良馬有不得騁者矣彼若扼江爲屯潛師於淮以斷鑿道或決水以瀦淮南之地則我軍何以善其後乎及李全倡議

平定州志

藝文 墓表

九

沾

南伐宣宗以問朝臣公多諫辭言天下有治有亂今但言治而不言亂國勢有強有弱今但言強而不言弱兵家有勝有負今但言勝而不言負此議論之所以偏也臣請兩言之庶幾見利害之全夫將有事於宋者非貪其土地乎第恐西北有警而南又綴之則三面受敵耳故欲我師乘時勢先動圖宋人今冬不能來或不敢來此戰勝之利也就如所料其利猶未可必彼江之南其地尚遠且有巴蜀爲之輔雖無淮南豈不能集數萬之衆俟西

北有警而綴我耶戰而勝且如此有如不勝其害
可勝言哉我以騎當步理可萬全臣尚謂恐有不
勝者今日之事勢與泰和不同故耳蓋泰和以冬
征而今以夏此天時不同也冬則水脈涸而平陸
多夏則水脈勝而泥淖多此地利不同也泰和舉
天下全力至於亂軍亦驅之爲前鋒今能之乎此
人事之不同也議者徒見泰和取勝之易而不知
今日之難且以夏人觀之當日弓箭手之在西邊
者一遇勅敵則搏而戰袒而射彼已喪氣奔北之

不暇乃今陷吾城而擄其守臣敗吾軍而擒其主
將曩則畏我如彼今則侮我如此夏人旣非前日
奈何待宋人獨如前日哉願陛下思其勝之之利
又思敗之之害無悅甘言無貽後悔可也章奏不
報是秋公主貢舉且取高帝以天下爲度命題以
諷焉時全一軍尋敗於淮上幾有隻輪不返之禍
宣宗責諸將言當使我何面目見揚雲翼耶河朔
民何經等十有一人爲遊騎所迫渡河而南有司
論罪當死公上章營救之曰法所以重私渡者防

姦僞也今平民爲敵所迫奔入於河緩死之計耳
豈有他哉使吾民不死於敵而死於法後唯有從
敵而已宣宗悟盡釋之哀宗以河南雨雹詔公審
理冤獄而不及陝西公言天下通爲一體今人一
肢受病則四體爲之不安豈可專治受病之處而
置其餘不問乎朝廷是之詔吏部郎中楊居仁審
冤陝西公之重人命慎於兵刑者類如此所著文
集若干卷校大金禮儀若干卷續通鑑若干卷周
禮辨一篇左氏莊列賦各一篇提點司天臺二十

平定州志

藝文 墓表

十一

沾

年雖老於其業積日累月不能了之事公一語破
的眾無異詞有以太乙新歷上進者尚書省檄公
叅訂摘其不合者二十餘條歷家稱焉德陵以庚
寅日啟土司天生陳舜舉言國音屬商金在庚爲
絕宜用乙酉金王日吉詔公決之公言上行年辛
卯乙酉雖爲金王終與行年相戾諱名不諱姓氏
所同也名所獨也且五姓之說在漢人猶以爲不
經前世如呂才一行皆神於術數尚辨以爲不可
用本朝部姓焉可必其於五音何屬乎卒從公議

有五星聚井辨一篇天象賦一篇勾股機要象數
雜說積年雜說皆藏於秘府孤子楊恕奉公之柩
將葬於某原之先塋涕泗百拜謂門下士元好問
言先公孝弟忠信始於事親中於事君終於兼善
天下者翰林修撰王彪狀具在墓當有碑敢質之
以爲請好問謝不敢當恕以大義見責曰先公平
生以國士待吾子乃不得論次遺烈以見於後世
乎好問度不可以終辭再拜曰謹受教乃爲文刻
之且系之以銘其銘曰天稟之攸百可施會門之

平定州志

藝文 墓表

十一

沾

傳儼若思菁莪樂育並以資大器備具無磷緇山
甫吉甫其庶而魯無君子焉取斯貞祐南駕傾朝
支忿兵橫出紛僵尸丁男役苦輸膏脂公獨上前
陳苦辭同仁一視父母慈越肥秦瘠小智私兩淮
民命我所司忍令矛端舞嬰兒崑崙神泉覆朮芝
危國可活民不疵如公豈無匡復姿天廢商久實
爲之孺子可教猶帝師惜哉不遭隆準時東隅之
日今崦嵫顧瞻喬木爲嗟咨峴山墮淚方在茲零
落何必西州詩

喬侍郎神道碑

彭時

公諱毅字志宏姓喬山西太原府平定州樂平縣人其先爲樂平著姓代有顯宦元左司郎中呂思誠譔其世次甚詳曾祖巖卿爲元萬戶嘗出粟萬餘石賑饑鄉民感其德相率償之悉不納祖彬魯隱居不仕以儒業教授鄉里父鑑仕爲縣主簿歷湯陰平谷二縣爲政得民心父祖考俱贈通議大夫工部右侍郎祖妣李妣李俱贈淑人初李淑人夢其家西山上飛金字榜長數丈俄落院中庭寤

平定州志

藝文 墓表

十三

沾 喬

而生公人以爲貴徵公自幼資質端厚性穎悟稍長刻苦問學隨父仕途見聞日益博學有資至正統辛酉以邑庠生中山西鄉試第一戊辰登進士入翰林爲庶吉士景泰元年庚午擢吏科給事壬申丁外艱乙亥起復改刑科天順元年丁丑陞都給事中前後屢上章糾治官邪規切政弊多見採納其出使外藩代祀嶽鎮皆以清謹稱戊寅陞大理寺右寺丞庚辰丁內艱癸未復入大理成化元年乙酉遷左少卿自居大理凡讞獄問法如何不

自爲輕重庚寅陞工部右侍郎時營繕頗繁公益用寬和勤慎佐其長事以辦治辛卯淮陽亢旱水淺舟膠漕運後期不至廷臣憂之以爲言上命公往督之公至揚州卽檄附河有司加工疏濬仍令漕舟首尾相聯以進然運淺輒阻塞雖併力推挽不能動於是齋戒禱於江海之神連三日夜江潮汎湧入漕河南船盡乘潮入壩其已過而阻塞者亦渙然通行矣人情欣悅咸謂公精誠所致癸巳七月陪祀山陵道得疾將事之夕同行諸公見其

平定州志

藝文 墓表

十四

沾 喬

憊止令勿行公曰諸公愛我厚矣但旣承命而來豈可因疾而止遂力疾往卽事成禮而歸歸益劇至九月二十七日竟卒距其生永樂辛卯七月二十五日享年六十有三公天性淳篤襟懷質直坦夷居家惇孝友父沒哀毀踰禮母晚得手痿疾衣服飲食公親奉之平居娛養以志比終扶柩還鄉哀感行路兄嘗自鄉來視公視之加謹推衣讓食情無倦焉居官泣事以勤慎爲本處同僚待官屬誠恪厚謙終始如一與人交無崖岸機穽發言吐

辭洞見肝膈無矯僞官登三品而服用簡儉如未
貴時公卿大夫皆悼惜之訃聞朝廷賜葬如制配
王氏贈淑人有賢行先公七年卒子男二人長鸞
先卒次鳳天順丁丑進士兵部郎中女一人適同
邑李友才孫六人憲醫學訓科宣宗宇延壽福甯
曾孫一永昌鳳扶柩還鄉以明年六月七日葬於
龐家里長壽山以王淑人祔前事奉檢討張頤之
狀來徵予文將碑於墓道垂示不朽予嘗與公同
遊太學同年登進士且同朝也俯仰三十年矣相

平定州志

藝文 墓表

十五

沾 喬

知爲深義不可辭爲之銘曰樂平喬氏世德遠而
積厚發宏公實承之早魁鄉選厥名四馳遂登科
甲顯用明時黃門棘寺侃侃其辭惟勤惟慎惟執
謙卑所居官治不詭不隨眾方矜衡公默以持人
所趨競公絕不爲公有隱德世弗盡知鑿智纖能
豈公等夷紹休有子遺慶在茲伐石刻銘以永厥
垂

喬少保墓表

明劉龍
尚書部

公姓喬氏名字字希大號白巘世居太原之樂平
曾祖鑑主湯陰縣簿祖毅工部右侍郎父鳳兵部
職方司郎中俱贈光祿大夫柱國少保兼太子太
保吏部尚書曾祖妣李氏祖妣王氏妣路氏俱贈
一品夫人路夫人嘗感異夢生公少奇穎比成童
日誦千餘言爲文浩瀚卽折衷理道人多奇之時
公從職方公宦京師少師邃菴楊公爲中書舍人
學行道誼名天下職方公以公與兄光祿公宗從

平定州志

藝文 墓表

十六

沾 喬

焉一時四方之士從遊雲集而談經取第之學莫
盛於此公以奇才壯志藻思沛然儕輩莫之與京
十七歲以金吾衛籍中成化庚子順天鄉試錄其
文以式甲辰中李旻榜進士通政司觀政天下名
士就交者甚眾相與講學之餘政事之要無不考
焉復倡爲詩賦一變時文之陋丙午授禮部儀制
司主事是歲東宮皇太子婚禮成及五王冠禮畢
俱有文綺白金之錫明年會試天下士署提調官
綜理有法撤棘之日簾內什用之器類爲有司所

取公則悉還之民丁未太宜人路氏卒歸葬樂平
公杜門謝客讀禮之暇惟以讀書考究爲事自是
所養益深己酉邃菴楊公以山西提學丁內艱歸
公命僕馬追送於長子縣時暑雨漳水泛漲屢遇
險谷幾出不測公處之坦如祖塋有松樹數百株
皆職方公手自封植夏有蟲食之殆盡公自爲文
以祭遂止庚戌服闋縣令趙鸞以金爲贖公却之
不受除吏部文選司主事公任禮部時才名甚茂
一時元老爭至門下太宰三原王公特有是選壬

平定州志

藝文 墓表

十七

沾 喬

子署考功員外郎補文選郎中日益策勵門無私
謁清畏人知凡三與考察惟公惟慎輿論稱允至
於拔進賢才杜塞僥倖屏退僉王無不贊而行之
一時聲名籍甚爲士類仰止壬戌遷太常寺少卿
八月有事南郊公導駕齋壇孝廟奇公貌日眞太
常也乙丑孝廟賓天公以執事哀送梓宮於泰陵
正德改元丙寅武宗皇帝卽位告祭天下山川公
分祭中鎮霍山黃河西海媧皇商湯王陵及晉代
藩諸王陵園事竣之日咨諏民隱爲六事上之多

見采納一曰恤邊民二曰厚邊軍三曰廣儲蓄四
曰省科派五曰慎守令六曰重祀典君子稱公有
良使風焉戊辰轉正卿無何轉光祿卿專以裁汰
浮費以甦民因爲務數十年積冗煥然更新一歲
陞戶部右侍郎庚午遷左侍郎邊餉供億不乏積
弊革除無遺春至六月不雨漕河涸公奉命禱祭
海嶽精誠所格駐節雨澤隨之祭竣遂霖雨四沛
無不霑足時宦官瑾用事大肆饕虐公卿多被通
關公恬然自守後瑾敗公矚然不爲所污辛未轉

平定州志

藝文 墓表

十八

沾 喬

南京禮部尚書公在南都禮曹事務清簡公餘得
縱讀國初所藏秘書於是所見愈邃清暇肆遊江
南山水大放厥辭如雲日光潔雖片語隻字爲世
珍重士林往往以不得公詞翰爲恥甲戌公考滿
例贈祖考禮部尚書給誥命廕一子送國子監讀
書乙亥改兵部尚書叅贊機務公自條陳宿弊以
明舊章數事一曰嚴操練以修武備一曰禁役占
以肅軍政一曰禁冗員以寬民利一曰買戰馬以
振軍威一曰定船差以便進貢一曰修船隻以便

差用遂爲定規以至考察軍政量力任使咸得盡其才後多致大位者公治尚簡靜說者謂畢公保釐之道時烏思藏傳聞國西有童子記其前生事者以爲活佛上遣使迎之公上疏極論其事不遺餘力且言國朝祖宗相承所以不絕番僧朝貢者不過羈縻遠方而已非崇奉信惑之也陛下天縱聖明無微不燭抑豈不知西方異端佛教無益中國乎南京御史林有年以言事被逮公論救以爲御史朝廷耳目之官凡政體民隱皆當言之其言

平定州志

藝文 墓表

十九

沾 喬

善則微婉將順而無悍訐之失其言未當則憤激太過而少和平之氣雖言有不同原其心皆忠於陛下非爲身家也近奉聖旨差錦衣衛官校挈解來京中外聞之罔不驚駭豈以諫官而被逮失禮御臣下之道疏上遂得釋上巡狩無時宣大之地往來數矣又復事於關陝以征伐爲名公上言天命人心累數百言無不剴切是時前星未曜中外危疑公疏乞早建立儲以安宗社不報己卯甯藩宸濠告變刻日東下欲取留都公乃預爲戰守之

具一時草創皆備率九卿臺諫籲天誓以死守城門設文武大臣各二員率軍以守城暗設軍二營以防不虞未幾濠預遣死士二三百人潛入留都伏於鼓樓街攬頭某人爲內應伺期而發守備太監劉瑯實共謀之公廉知先縛攬頭一掬而知之多執簡謀以次而擒梟首江岸都城獲安賊計少阻而公江防城守甚多嚴備尋聞賊至安慶爲安慶守備楊銳敗之濠怒曰安慶一蕞爾尙如此况南京乎且聞喬尚書甚有備將如何也乃殺方士

平定州志

藝文 墓表

二十

沾 喬

數十人賊退兵是夜西北風惡甚舟纜盡絕比曉至鄱陽湖遂爲中丞王公乘之不戰而潰先是公視機務時密得濠反狀又知指揮銳有才畧可用乃署爲安慶守備戒之曰安慶南京上游也密邇江西賊計汝必先知知則速來告賊至必先攻安慶則汝死守之未幾賊變銳果成其用公之功於是爲大設使安慶無銳順流而下焦爛者豈能成殄滅之功哉較論公之功當受上賞終以爵不酬勞爲天下惜之先是濠變分布僞檄留都諸臣不

敢上聞公獨密遣官馳奏時上在西海巡獵覽奏
回內遂謀親征十二月上南狩至則叛逆已平遂
受朝政於行在初有旨命百官以戎服朝見公獨
以兩京禮儀一體豈容有異遂朝服率諸臣見時
倖臣江彬以權寵勢燄傾人欲謀不軌公以雅量
鎮服其邪彬始欲搆公使人攬摭其事卒無所得
駐蹕既久宸極爲虛公倡九卿臺諫凡三上章公
獨伏闕上疏勸回鑾輿以安定社稷爲計九月上
還公扈從至揚州歸辛巳五月公考績錄前功加

平定州志

藝文 墓表

二十一

沾 喬

柱國少保太子太保七月詔拜北京吏部尚書辨
論官材總統百度至於君子小人之際尤加意焉
賢必進不肖必退中外翕然稱之上入承大統新
政之初銳意圖治甚倚重於公公亦忠勤靡倦知
無不言言無不盡革弊興廢公力尤多上疏早視
朝以隆聖政蓋爲人君法祖憲天莫不以勤而治
天下臣工莫不交相慶幸上遂嘉納焉壬午上御
極之初命侍經筵上親耕藉田與行九推禮幸太
學釋奠先師孔子特與分獻禮畢復至彝倫堂命

祭酒司業講書賜坐聽及賜茶而退癸未王會之期裁革冗濫至四千餘員宿垢積污廓然一新君子謂太平熙洽之治蓋始於此矣春三月廷試天下士公爲讀卷官所選多文名之士夏偶值休沐上遣內使賜賚粥米瓜菜三次復遣鴻臚寺慰問甲申公以議興國大禮凡三抗疏乞休遂得俞允歲給人夫月米馳驛還鄉有司以禮存問公歸樂平拓地建宅徜徉於山水中至朝廷之事多不言及辛卯鎮江少師邃菴楊公卒公門下士也挈舟

渡江弔之及過江之日江南父老識公者舉手加額曰活我公也多遺之以禮不受十月歸偶感痰疾於十二月十六日卒春秋六十有八公少從少師楊公遊遂爲高弟旣舉進士又從文正四涯李公遊益肆力於文字間其所友者皆一時之彥德行道誼漸磨者深焉公居清職雖少煩劇餘暇必友會作文而性命道德浩如也至今北方之士言文苑者必以公爲首焉爲文不以蹈襲爲工出入六經深沉醞郁自成一家有克蒙稿若干卷其爲

詩始擬古作後擺落陳詩往往多自得語樂府雄雋有漢魏風識者以爲渾然一代大家之作尤嗜山水嘗歷雲中上恆霍登嵩華海岱太行及江南名山搜奇抉隱人莫之及通篆籀有二李風晚精鑒賞名書帖一見知也性淳儉所用皆陶甃器衣服恂恂與寒士角而延接儒雅恐不及見善如己出見不善義形於色卒之曰天地晦冥陰霾集霰布滿城郭數十里之內樹木盡白識與不識言之多有嘆息泣下者至二妾從死尤人所難可以見

平定州志

藝文 墓表

二十二

沾 喬

公之誠無所不謹也公娶董氏封一品夫人先卒次室包氏生子永殷補公禮部廕娶陳氏生男一繩武聘孫氏已於嘉靖十三年二月十七日葬於長壽山侍郎公勅塋之次嗚呼公已矣追念疇昔九原永隔不可復得而見之矣忠賢彫喪世故奚賴吾人安歸惟公丰骨玉屹舉止凝重雍粹若天成加以踐履充養動爲遠大作程自郎署迄槐位躡華陟要內外廻翔四十餘年歷事四朝受知列聖夙夜圖報第黽勉以忠愛爲主加以積誠崇格

履坦執下翼正操約不詭不激不援不隨率皆於
天理上發見大斥權奸獨力期回天定邦國安社
稷慷慨任重以故直聲壯節丕振中外睦族屬化
鄉曲息強暴恤親舊大抵根本卓然暢之以爲經
緯若公者可謂生順沒甯垂竹帛之清芬還河嶽
之正氣若夫考其行則如珪璋之潔遡其業則如
日星之炳揆其雅望則如山嶽之屹鍾靈挺秀譬
之景星鳳凰輝映兩間而爲世之瑞國之珍者自
有吾道之清議天下之公論在焉龍仲子承恩爲

平定州志

藝文 墓表

二十四

沾 喬

公從甥龍與公姻契且同鄉同朝知公爲最詳永
殷持一石陳公所著狀龍叙而俟銘之以光幽壤
俾附家乘匪但子孫千百禩之幸也

李叅政墓誌銘

明 王雲鳳 都御
史

正德庚午冬予謝病歸山過樂平公來會於邸告
予以劾蔣琮事曰琮狼黠人也初守備南京欲陷
縉紳不測之禍以立威覩縷屑細誣奏臺諫數十
人謫以去勢益張又連訐諸司官俛首就逮冤鬱
不伸余念幸蒙恩爲言官不可坐視然人方縮悶
莫敢誦言攻之異時一二雄俊敢言之士皆以時
不可爲解一日余騎馬出門默默獨行忽遇郭御
史者告之故郭欣然同議遂各疏琮大罪數事合

平定州志

藝文 墓表

二十五

沾

同官上之乃下獄以死公爲言官所論列關於朝
廷政治之大者雖多惟蔣琮則當其寵倖初隆氣
燄方張之日尤爲人所難余別去踰年而公病又
數月而訃至其子天衢以沈教諭磐狀請銘乃述
其事公之告我有以夫按狀樂平之李先世居平
定五代祖諱唐自平定來徙生五子次子諱從善
公之高祖也曾祖諱德祖諱季忠考諱甯皆稱長
者而祖尤爲鄉人所信服年九十以壽遇詔冠帶
考以公貴封南京刑科給事中進封南京光祿寺

少卿妣劉氏封孺人進封宜人公諱岱字宗嶽生而穎異長而能文魁其儕輩家貧嘗躬杵臼以養親夜雨敗鄰人之垣若有藏物家人欲取焉公聞而止之翼日其家始覺得錢數斛邑人有受金縱盜而情可原者縣令與其人有讐欲論以死翟清者被怨家誣告魘魅死罪公皆爲營辯得出登成化丁未進士宏治二年拜南京刑科給事中有直聲上檢身求言敬大臣謹天變數事多見采納尚書鄭時不職內官張廷縱恣殺人都御史秦公紘

平定州志

藝文 墓表

二十六

沾

爲安遠侯柳景誣奏公倡諸臺諫言之秦公竟得白時罷去廷置於法又言前威甯伯王越不當賁緣起用公謙抑簡靜爲言官數年不形於色至有檢覆勘問之事人必稱平十年遷南京光祿寺少卿每歲上供天鷲鹿腊皆以樊籠生致於洞嶺海五六千里之外民病之旣腊或不堪充庖公言於太宰倪公因災異陳言及之止徵其值上供法醞每歲入送用舟八十餘艘役夫爲奸且不時至爲之籍使有統紀弊遂絕正德三年考績至京時劉

瑾用事大肆饕虐公卿而下鮮不以賄通多至千金少亦數百金公獨無所餽或曰君禍至矣公曰命也適天衢刑部郎中以無罪被逮又不以餽或曰君禍大矣公曰命也天衢竟出爲陳州守居無何吏部薦公爲太僕少卿瑾識其名乃令致仕公不戚而喜於是士大夫嘖嘖嘆公有守而公名亦重矣公生平不事交結瑾誅當內遷乃外補陝西布政司右叅政未行丁父憂七年二月四日病卒年六十有八配趙氏封宜人子男三天衢丙辰進

平定州志

藝文 墓表

二十七

沾

士河南按察司僉事天街天衢十二月六日葬於祖塋獅子山之原於法宜銘銘曰維德蘊才才或鮮德悃幅君子確然內植優以施之人莫我惑摧奸如山拯善如溺乃掌王饑惟民之惻起頽而趨撫困以息忤時歸來厥聲有赫身在田園心在邦國欲考公世視此銘刻

榆菴趙僉事墓誌銘

趙用光

公初諱思聰其登進士以嘉靖乙丑以與聖御諱嫌遂更名思誠於時舉主袁文榮公以汝存字而自號榆菴世太原樂平縣人祖瓚以椽史起家爲白河口巡檢南旅如織至不索一錢家人或勸之則動色怒罵然性實寬慈以故人愛而慕瓚生文淵有父風翱翔士林晚乃棄去徜徉泉石閒娶於常感異夢而生公總角讀父書卽穎絕過人兼有志槩時有憲使者行部過其門鼓吹旂常喧填里

平定州志

藝文 墓表

二十八

沾

開公恬坐讀書若罔聞也者十九補邑庠弟子員愈益攻苦獨處斗室中卧起一榻擁書數卷家貧無燭手劈松枝耀夜宵旦吾伊卷不去手己酉薦於鄉人謂趙生才且穉萃淹雅可唾手取上第顧猶六上春官始成進士試政吏部人皆纖趨依諾羣聚則有相調爲戲謔耳公獨抵掌談天下事慷慨激發聞者聳壯以次授山東萊州府推官時有樂侍御獄不決久公一問具伏百姓驚猶神明且寬平廉恕多所平反一時能名幾蔽東海矣穆廟

在宥惟聞公賢趨召公而適有繼母之訃遂以憂歸既服闋授兵科給事中錄前司理績以新銜贈其父而母常氏贈孺人公固伉直不阿既給事兵垣益抒發其所自負一切糾彈無所規避聲隆隆出省署間而忌者中之遂陞河南僉事以去其在河南清理驛傳鹽法梳抉垢蠹不遺餘力中州人甚德之以專祠祀公無何陞太僕寺少卿兵備莊浪靡不讐其威無敢肆窮邊孱卒稍稍有起色矣乃又以口語謫歸居家逾年調湖廣兵備時江陵

平定州志

藝文 墓表

二十九

沾

竊政播弄威福可炙手熱仕宦過荊州者必抑首前謁公獨不往久之所部吏以意見相齟陰肆媒孽遂解組歸不與較也歸時六十有五閉門絕客時出舍於鄉躬督田事羣弟子讀古人書而躬訓齊之凡所匡提必聖賢格言綱常至理一切怪誕不經之書儂薄弔詭之事必痛爲檢飭不欲其聞且見也先是邑庠生少與解額者公捐貲修葺學宮又改邑南門東向挹蒙山之秀嗣是取科第者面背相視黨里有窘乏率周恤之如恐不及節行

風表冠冕一時一時人無不稱公長者於萬曆二十八年八月初一卒生嘉靖二年九月二十日得壽七十有八配張氏封孺人子士魁貢士俊庠生卜葬於城西桃花池公姪滑縣令士吉予同年友厚善者以計入都手執公狀以誌若銘請予辭不獲遂勒其事行而系之以銘銘曰公志在天下不獲究而約之邑民式士茂約之身躋上壽延之族姓克昌厥後冥冥者天謂薄於究公而享公者厚所謂疎而不漏者耶

平定州志

藝文 墓表

三十

沾

華菴趙大尹合葬墓表

李維正 叅政

河南知澠池縣趙公洎配喬孺人以萬曆丁亥二月二十五日合葬北平從新阡也公生正德丁丑九月初七日卒萬曆辛巳四月初四日春秋六十有五孺人生正德戊寅六月初八日卒萬曆乙酉十二月初七日壽六十八云公先娶張氏蚤卒孺人其繼配也公有子四學優貢授河南永甯丞綽有當官之譽娶李氏繼張氏學古大學生娶王氏繼申氏焦氏學可增生先卒學博恩貢娶李氏平

定鳳陽知府愈女繼張氏女二適庠生張志楊九
德喬出孫男七綱庠生綱舉人納庠生優子紹古
子綜纘庠生編博子孫女七俱幼公夫婦世行載
諸誌銘可信世垂不朽永甯丞日誌銘藏諸幽不
有表焉樵牧無禁咎將曷歸乃介邑博程君勺言
余余以通家何辭故據狀爲之表曰公諱敏字體
乾號華菴其先有子政者爲金元帥領臯州遂隸
籍茲焉世業儒簪組蟬聯爲邑著姓曾祖哲太學
生祖鶴邑學生父溪榮邑學生母郝氏生公公生

平定州志

藝文 墓表

三十一

沾

穎異雅不好嬉遊甫齟善屬文尤工對句至舞象
年卽嫺古文詞沈浸經史醜郁百姓已乃從侍郎
南泉楊公魚泉李公遊業益精試輒冠曹耦督學
栢泉胡公獨奇其文首拔之一時譚執家鈔不嘖
嘖樂平趙公云初公弟惠與公齊名無何惠卒公
乃築舍連雲洞拉從弟恆藏息焉且贍給之嘗值
歲儉舉所積賑鄉族媼黨無恹色大世父鷓乏嗣
命公繫孫列爲之後公辭蓋賑糶舒困不嗜阿堵
中物素性然也嘉靖乙卯與恆同舉於有司里閭

舉手加額謂食報云其後數走禮闈不第隆慶辛未謁選授沔池令然非其好也沔當南北要衝送迎無虛日供億費煩公至乃均徭役撫饑疲勸農桑平訟牒飭學校課生徒帀期沔稱治境當塗屢檄旌異乃投劾不待報徑歸歸則別構精舍終日焚香危坐誦古不輟思義有得卽中夜起書久之戶牖屏几皆成格言又以其緒餘成就來學遠近爭趨赴之作家訓以孝弟勤儉規失勸業以故率循雅飭見者不問知爲趙氏子也所著詩文若干

平定州志

藝文 墓表

三十一

沾

卷藏於家孺人幼失恃繼母性峻孺人婉婉柔順慎女德精女紅葢不欲以逸違母志也迨歸公公爲諸生孺人則夜燈伴讀內外其肩葢不欲以他務分公力也公宰沔畏四知慎一錢孺人則佐以儉葢不欲以賄傷公操也眾務劬勩公饑不及食孺人則佐以勤葢不欲以勞隳公志也待諸子慈不弛教嚴不傷恩葢不欲以縱誕敗公後也處娣姒以情御臧獲以寬葢不欲以盛滿虧公節也嗚呼公樹德於時孺人比德於公葢律呂相合琴瑟

而靜好者也粵稽古昔高士傳稱君子眾矣不必
其有賢婦列女傳稱女德眾矣不必其有賢夫梁
伯鸞孟德耀夫婦齊德矣未必其貴而能抑多賢
子孫也若公夫婦者蓋罕儷哉夫仲尼趨冕者之
前以貴也文侯式干木之廬以賢也公夫婦貴矣
賢矣矧多賢後矣誥贈之典可指日俟姑述此以
表於墓行道者過而不知敬是無耳目人也尚式
旃哉

來暄趙僉事合葬墓誌銘

桑

芸

河南布政

平定州志

藝文 墓表

三十三

沾

余與來暄趙公同薦鄉書余雖糠籩先售越癸未
公成進士聚晤京邸蘊藉風采修髯偉貌余所不
敢肩隨者也迨余抗疏忤執政謫武林經秦淮公
時秉憲金 迎膝語並勵雅尚豈知浮沉中外
過里門正 玉公竟作古人哉公捐館之前五
日自 子倬伋曰銘我墓者必桑子也余
何 公諱曰爌字遠耀人所稱來

平望族青箱紅廩奕葉耕讀

貴贈諫議門祚益昌文淵

生思明思誠思溫思恭思忠凡五門仲登進士五
門之子士吉登進士長門之孫卽公登進士三門
之孫曰慧舉孝廉而近枝聯萼公之服兄國鼎以
解元登進士遠邇艷稱之思明生士選增廣生封
江南僉憲卽公父也娶喬宜人係莊簡公孫女實
生公行二生而沈敏敦裕天性孝友在襁褓以顯
親自許果貶封兩尊人如其官事兄曰煉撫弟曰
燧課藝讓產始終無間言讀書不屑咕嗶搦管尤
不屑餽釘意在筆先淳涵閱肆神理自全試輒前

平定州志

藝文 墓表

三十四

沾

茅三晉士望而左辟焉乙亥以庠廩拔貢大廷已
卯捷晉闈癸未登第釋褐鄉房師蕭公會房師辜
公俱宗匠具眼一時賞鑑稱最錦旋卽值闖亂新
貴多受僞檄公奉太翁入山婉辭如閔子之汶上
云義兵殲闖敷天憤雪公被薦投袂起授博野令
博野近畿多盜公科條要束簋無饗染庫無羨積
盜自遠引他徙有前案被寇牽罹者百餘人虜訊
失入公下車燭照斧折片言爰書原情酌法豁寃
活命及遷司寇郎部中堂司無不知博令明斷者

素望非一日之積也交章薦考臺省又咨送考文
衡公羸馬浣衣恬衷端步反以不得爲榮以資望
補江南協臬奉

勅督驛鹽地當水陸華奢舟車絡繹而鹺政又貪泉囂
藪其大者如運快二丁互爲詭抗公勒爲船政新
書積弊頓釐務爲垂久代攝穎道篆恤災墾荒寬
租愼罰嗷鴻息而挺鹿安幾不以代庖視官在建
康六年優薦七次主爵者擬卿用

內召公念太翁耄耄堅請終養彼王事鹽而子職缺者

平定州志

藝文 墓表

三十五

沾

較公何如哉極滲瀉斑彩娛親復推親之心敦族
睦鄰俱沾餘祿偶城垣傾圯捐貲倡築閭邑恃爲
保障居官居里崇尚大義率類此公夙有胃腕之
疾奉太翁盡禮雖耆艾宦成聞言必跪公以養親
辭官封君九十餘健飯公竟先逝豈非竭力尊養
自處盡瘁者耶卒於順治己亥仲春八日距生萬
曆丁酉孟夏十七日享年六十三配張宜人繼閨
宜人俱佐讀持家閩德純備子四長任早卒次化
邑廩生亦早卒三倬邑庠生四伋邑廩生倬與伋

卜日葬於桃花池之祖塋啟二宜人祔禮也余載
筆喟嘆豈宣孟之勲千秋未艾何趙氏之多賢也
公位方面而抱未酬算杖鄉而積未竟貽謀昌後
蘭玉森立眞可光前啟後矣因爲銘銘曰臯落之
墟星雲結桃池吉壤綿瓜瓞公鍾光嶽振闕閱彩
毫早擅巍科掇鳳輝遭闖羽能潔剖竹
聖朝華封閱折獄片言積寃雪顯陟爽鳩出秉臬金陵
佳麗吻無餐船政新書沿陋絕居官耐冷偏辭熱
子舍櫻情脫紳纈豈知親健身先別邑城捐瘡如

平定州志

藝文 墓表

三十六

沾

官烈至今月評哀嗚咽子孫象賢卜瓊穴我爲銘
語確貞碣不朽佳城存劍映

長子縣廣文張公墓誌銘

曹學閔

太僕
司卿

甲戌春余與鶴雲張公同舉詞垣同館同里相得
甚歡每於叙談時得悉年伯大人家世知爲古道
君子余竊心儀之而未能忘也已丑夏六月鶴雲
走使持狀至京師將於來歲二月葬翁於本里祖
塋丐余銘墓余聞狀不勝驚駭自維於公知之頗
悉無以謝余同年請遂不獲辭按狀公姓張氏諱

珍字仲璧別號圓峰其先世本籍榆次人鼻祖彥
達公徙籍樂平生子鏞字金聲公由歲薦晉秩刑
曹斷獄以平允稱從此繩繩繼繼代有聞人傳至
九世邑庠生例贈文林郎乃懿公諱受休卽公考
也生三子公居季幼穎果過目成誦贈公深器重
之年甫冠補博士弟子員旋食廩餼學問淹博爲
文古宕有奇氣顧屢舉不一售晚以次貢大學授
潞安府長子縣儒學訓導勸課士子綽有師範長
邑知名士率爲所造就後以年屆七旬遂爾懸車

平定州志

藝文 墓表

三十七

沾

功成告退其得二疏之遺意與性至孝事贈公夫
婦承顏順志弗稍懈於諸兄克盡弟道孝友之稱
鄉黨無間言胸懷坦白不設城府寬和樂易中正
非一意糶稜輕財好施姻戚尤加篤厚晚年學業
益進識見逾老文章道誼爲士林所矜式乙亥舉
鄉飲大賓邑侯給匾以贈於以見翁之植德立品
爲有素也達尊有三公殆兼之矣居家嚴肅有體
訓子以義方延師課讀惟以遠大相期令嗣佩服
庭訓力行績學隨取上第名藉詞垣爲少司寇維

城錢公所賞識繼以玉堂偉望出宰百里刑清政
簡居然有古循吏風諸孫鵲起鵬騫英年拔幟將
來造就正未可量行見組綬蟬聯紆拖青紫荷

龍章而膺寵錫榮封正未有艾也古云積善之家必有
餘慶諒哉公卒於乾隆三十三年五月二十六日
寅時距生於康熙三十四年四月初二日辰時享
壽七十有四原配王孺人先公逝温恭淑慎貞靜
賢明蓋與公比德焉子一人鶴雲甲戌進士翰林
院庶吉士原任河南陳州府西華縣知縣孫二人

平定州志

藝文 墓表

三十八

沾

長志濬邑增廣生次志澄邑廩膳生曾孫四人銘
曰磅礴蜿蜒松峰側篤生人宗空冀北維公總角
卽歧嶷萬石醕謹垂令則孝友無慚張仲德秉鐸
漳庠共矜式春風時雨歌樸棧堦前玉樹躬自植
蘭桂崢嶸光邦國老成典型猶堪憶

龍章寵錫應不忒億萬斯年此銘刻

風木圖序

朱

衣

明按
察使

風木圖者吾郡守中菴趙公諱恆廬墓圖也公晉之名士夙以孝謹聞余守上黨時鄉獻民嘖嘖稱述余耳其事蓋景仰爾未悉也居無何公以名刺史自陝郡來守南安駐節吾岷余分切孔邇自上黨使使樂平侯起居使報命公行矣云公自博士弟子員卽敦行古道繼而登賢書三晉士爭納交其爲人所推重類如此公學不干祿而祿養心切忽丁外艱哀毀踰禮人勸之以大夫人在堂也日

平定州志

藝文 遺編

三十九

沾

視甘毳無少懈將上南宮又以大夫人春秋高有難色大夫人謂公曰吾所望於若者顯親揚名詎以不遠遊爲孝耶爾急去勿余念公不得已行瞻岷戀戀心固未始離親側也旋夢有感一如古人嚙指心動急急遄歸而慈侍已不待矣公入門一號絕而復甦水漿不入口者數日人勸之止則泣而對某不孝遠遊不獲侍吾母終某何容於天地間又何忍歸吾母於淺土而朝夕離乃鑿塢於封樹之旁寢苦枕塊日負土成 五味不入口哀至

則哭而奠值雷雨則跪於墓側曰兒在此母無怖
其哀毀狀難具述如是三年不忍歸雖故舊饋食
飲弗受也然士君子感公能行古道而又不忍公
過於禮也勸公返舍公不獲已歸入則瞻幃出則
皇皇然又如向之離親側也乃肖廬塚像祀之家
公行則負之如事生時不肯跬步離也以故鄉人
號曰趙孝子孝子云余聞使者言則不覺撫心顧
紹介末由也歲戊子余至自薊門謁公適公以最
奏蒙恩數贈二親如其官光及泉壤猗歟盛矣士

民躋公堂稱觴爲賀公愀然懸像具拜且泣下嗟
嗟奈吾二親弗及見也余乃俱悉廬塚事如使者
言而知公孝思之純無頃刻已也嗟嗟人子祿養
之心孰不欲父母具慶娛樂綵於千百歲也但難
得而易失者時也欲養而不待者親也此臯魚興
風木之嘆仲由動負粟之悲人皆有是心而歉拘
終天者多矣惟公茹苦含哀情事畢伸所謂終身
慕父母者也豈特三年苦塊之思哉是以宦車所
至澹然琴鶴仁孝所孚不言而化郊陝甘棠之澤

至今口碑在焉子惠吾岷者又五六年所冰蘖清
素一如寒士識者窺公不純綵之心持之無斃也
而岷人薰而善良者實繁矣嗟嗟聖天子以孝治
天下而一公以純德師帥宣化寓內將與古之大
孝達孝者埒甯止化及一方耶是行也海內薦紳
重之久矣曾繪之簡冊爲詩章若干咏嘆其事余
受誦未竟而淚津津下矣蓋素懷蓼莪之戚固應
若此而秉彝之心豈獨余哉詩云孝思不匱永錫
爾類公之謂矣不佞沐公德教最稔自以爲知公

平定州志

藝文 遺編

四十一

沾

也乃敢附數言於圖之末

工部郎中慶門趙公墓表

大理寺
正卿

張三謨

公諱士吉字修之號慶門其先世居城南里許鐘
村高祖子華華生巡檢公瓚瓚生贈兵科給事中
公文淵淵生封文林郎滑縣知縣公思忠文林公
娶封太孺人李氏生公兄弟三人公卽長次中書
舍人士廉季庠生士進公生穎悟神情開美文林
公器重之不責以他務使得肆其力於學業於萬
曆辛卯中晉省經魁登乙未進士初任陽武有善

政調繁滑縣知縣會考績竣後召適丁外艱服闋
補恩縣知縣陞都察院經歷晉陞工部郎中提督
通惠河道持廉秉公權勢貂璫爲之斂迹公不媯
於一切軟巧宦術當事者不悅誣以他事竟罷公
歸退居田里杜門謝客無復營情宦途以耕田課
子姪爲事故子姪輩登科甲者數人公性嗜詩書
至老不倦居家克盡孝友筮仕每多德稱與鄉人
居坦易和平不立崖岸優游林泉四十餘年絕口
不道宦事尤爲人所難明哲恬退公眞古人矣公

平定州志

藝文 遺編

四十二

沾

元配封孺人張氏生二子長庠生曰烜次太學生
曰焜繼娶孺人王氏生一子曰燦伯季俱無出先
公逝葬於祖塋之側其次子暨孫廩生永堂丐予
爲文以表其墓予嘗敬公之品以先輩事之其行
事姻黨載在吾誌中復述其世系履槩以爲表

